



ワ 4
6640
68.



74
6640
68

五禮通考卷第一百七十八

內廷供奉禮部右侍郎金匱秦蕙田編輯

李太保總督蘇都御史桐城方觀承同訂

嘉禮五十一

翰林院編修嘉定王鳴盛

直隸按察副使元和宋宗元

參校

巡狩

蕙田案巡狩之制見于經者多矣參以史記
五帝本紀及竹書紀年皇甫謐帝王世紀羅
泌路史金履祥通鑑前編諸書則自黃帝顓
頊已有巡方之典不始于唐虞也蓋先王以
此察諸侯之政治聯遠方之聲教諮兆民之
疾苦乃維持天下之大權其意深遠矣秦漢
以下封建變為郡縣形勢雖異於古然時邁
所及察吏治觀民風考其用意與唐虞三代



木下中也
寄

91-0745

五禮通考卷一百七十八 巡狩

若合符節焉唐開元禮及杜佑通典以巡狩屬吉禮宋史改屬嘉禮今從宋史先之以經訓而後世之史事附焉

易觀卦象曰風行地上觀先王以省方觀民設教

程子曰風行地上周及庶物為游歷周覽之象故先王體之為省方之禮以觀民俗而設政教也天子巡省四方觀視民俗設為政教如奢則約之以儉儉則示之以禮是也

朱子曰省方以觀民設教以為觀

春秋莊公二十三年左氏傳諸侯有王注從王事王有巡狩注省四方

孟子齊景公問于晏子曰吾欲觀于轉附朝舞遵海而

南放于琅邪吾何修而可以比于先王觀也晏子對曰

天子適諸侯曰巡狩巡狩者巡所守也無非事者春省

耕而補不足秋省斂而助不給夏諺曰吾王不遊吾何以休吾王不豫吾何以助一遊一豫為諸侯度注言天子出必因王事有

所補助于民無非事而空行者春省耕補耒耜之不足秋省斂助其力不給也晏子又道夏禹之世民之諺語王者巡狩觀民其行從容若遊若豫豫亦遊也遊亦豫也春秋傳曰魯季氏有嘉樹晉范宣子豫焉吾王不遊吾何以得見勞苦蒙休

息也吾王不豫吾何以得見賑贍助不足也王者一遊一豫行恩布德應法而出可以為諸侯之法度也

今也不然師行而糧食饑者弗食勞者弗息

明胥讒民乃作慝方命虐民飲食若流流連荒亡為諸

侯憂從流下而忘反謂之流從流上而忘反謂之連從

獸無厭謂之荒樂酒無厭謂之亡注謂明側目相視更相讒惡先王無流

連之樂荒亡之行惟君所行也注言聖人之行無此四者

天子適諸侯曰巡狩春省耕而補不足秋省斂而助不

給入其疆土地辟田野治養老尊賢俊傑在位則有慶

慶以地入其疆土地荒蕪遺老失賢培克在位則有讓

注慶賞也養老尊賢能者在位賞之以地益其地也培克不良之人在位則責讓之

白虎通德論王者必制巡狩之禮何尊天重民也所以至四嶽者何盛德之山四方之中能興雲致雨也以夏之中月同律度得其中也

風俗通義巡者循也狩者牧也道德太平王者為天循行以牧人也恐遠近不同化幽隱有不得所者故自躬親行之

孔氏穎達曰所以為此巡守之禮者以諸侯為天子守土專制一國告從令行而王者垂帷端拱深居高視一日二日庶事萬幾耳目不達于遠方神明不照于幽僻或將強以凌弱恃眾以侵寡擁遏上命冤不上聞而使遠道細民受枉聖世聖王知其如是故制為此禮時自巡之

呂氏祖謙曰巡守之禮此乃維持治具提攝人心聖

人運天下妙處蓋人心久必易散政事久必有闕一次巡守一次提攝此新新不已之意

朱子曰或問建牧立伯小大相維自可以垂拱無為矣何故復有巡守之舉豈牧伯不足任耶或云因以祭天且朝諸侯又云君民一體不可邈然不相接故必躬親巡撫然後上下情通而教化洽矣此先王之誠心二說孰是曰建牧立監與巡守之義並行不悖祭天朝諸侯巡撫之意皆在其中矣先王之政體用兼舉本末備具非若後世儒者一偏之說有體而無用得本而遺末也巡守亦非舜創立此制蓋亦循襲將來黃帝紀亦云披山通道未嘗甯居

右巡狩名義

書舜典五載一巡狩羣后四朝

注各會朝于方岳之下凡四處故曰四朝堯舜同道舜攝則然堯又可知

巡狩

疏每五歲一巡守其巡守之年諸侯羣后四方各朝天子于方岳之

下凡四處別朝故云四朝肆觀東后是為一朝四岳禮同四朝見矣

朱子曰五載之內天子巡守者一諸侯來朝者四蓋

巡守之明年則東方諸侯來朝于天子之國又明年

則南方諸侯來朝又明年則西方諸侯來朝又明年

則北方諸侯來朝又明年則天子復巡守

蕙田案四朝有三說謂四面各朝于方岳之

下者孔安國馬融王肅孔穎達也謂四季朝

京師者鄭康成也謂五載內諸侯來朝者四

皆分方而至者朱子蔡仲默也當以朱蔡之

說為正說見賓禮

禮記王制天子五年一巡守

注天子以海內為家時一巡省之五年者虞夏之制也周則十二歲一巡守

疏鄭志唐虞五載一巡守夏殷六年一巡守此云虞夏之制以夏與虞同與鄭志乖者以羣后四朝文在堯典堯典是虞夏之書故連言夏其實虞也

白虎通德論所以五歲巡狩何五歲再闡天道大備

王者恩亦當竟也不及五載為太煩也過五年為太

疎也王者因天之道時有所生歲有所成三歲一闡

天道小備五歲再闡天道大備故五歲一巡狩春秋

穀梁傳曰古之君子以時視民之勤此之謂也

蕙田案以上巡狩五年之期

周禮秋官大行人十有二歲王巡守殷國

注王巡守諸侯會者各以其時之方書曰

遂觀東后是也其殷國則四方四時分來如平時

疏云殷國四方四時分來如平時者謂分四方各逐春夏秋冬如平時若六服盡來即與平時別也

李氏曰周以木德王歲星是木王之星十二歲一周天故巡守取歲星一周天道大備之數也

鄭氏鐸曰至十二歲王乃巡其所守變禮易樂者可以知其畔革制度者可以知其逆或討或流于是行焉或有故而不巡守則合天下諸侯皆來朝王于京師考其制度焉是謂殷國殷

者眾也言命眾國而皆至也

楊氏曰虞舜之世其事簡其人寡其于巡守也兵衛少征求輕故行之五歲不為數成周之世其事繁其人眾其于巡守也兵衛多征求重故行之十二歲不

疎

王氏安石曰王巡狩則諸侯各朝于方岳王不巡守則會諸侯而殷見或巡守或殷國其出而省焉一也
呂氏祖謙曰巡守之禮唐虞五載一巡守周御十二年何故蓋周時文治漸成禮文漸備所以十二年方舉巡守之事此是成王知時變議會通處

蕙田案巡守與殷國乃兩事非一事蓋十二年一巡守者其常也或十二年之期已周而天子有事不能巡守則行殷國之禮此其變也鄭注甚明王氏李氏乃云殷眾也謂當方諸侯則以巡守殷國為一事矣案此經上文於春朝秋覲夏宗冬遇之下明云時會以發四方之禁殷同以施天下之政鄭注云時會即時見也無常期諸侯有不順服者王將有征討之事則既朝王命為壇於國外合諸侯而發禁命事焉殷同即殷見也王十二歲一巡守若不巡守則殷同殷同者六服盡朝既

朝王亦命為壇於國外合諸侯而命其政殷同四方四時分來歲終則徧矣然則殷者諸侯朝王之一法因王不巡守而行之故竝繫于十有二歲之下鄭注云如平時而賈疏復申之云若六服盡來即與平時別者六服盡來不分四時此時會也雖不按服數而東春南夏西秋北冬四方分來此殷同也時會乃因王有征伐故行之則非常之事故六服盡來殷同特以代巡守故不必一時皆集義各有當耳王荆公說最確當從之

書周官六年五服一朝又六年王乃時巡考制度于四岳諸侯各朝于方岳大明黜陟

注五服侯甸男采衛六年一朝會京師周制十二年一巡守春東夏南秋西冬北故曰時巡考正制度禮法于四岳之下如虞帝巡守然四方諸侯各朝于方岳之下大明考績黜陟之法疏此篇說六年五服一朝周禮無此法也

周禮大行人侯歲一見貢祀物甸二歲一見貢嬪物男三歲一見貢器物采四歲一見貢服物衛五歲一見貢材物要六歲一見貢貨物先儒云見謂來朝也必如所言則周之諸侯各以服數來朝無六年一朝之事昭十三年左傳叔向云明王之制使諸侯歲聘以志業間朝以講禮再朝而會以示威再會而盟以顯昭明白古以來未之或失也說者以為三年一朝六年一會十二年而盟計彼六年一會與此六年五服一朝事相當也再會而盟與此十二年王乃時巡亦相當也叔向盛陳此法以懼齊人若周無此禮齊人當以辭拒之何所畏乎且云自古以來未之或失則當時猶尚行之明周有此法禮文不具耳大行人所云見者皆言貢物或可因貢而見何必見者皆是君自朝乎遣使貢物亦應可矣大宗伯云時見曰會殷見曰同時見殷見不云年限時見曰會何必不是再朝而會乎殷見曰同何必不是再會而盟乎周公制禮若無此法豈成王謬言叔向妄說也

朱氏升曰案此篇與今周禮不同此言六年五服一朝而周禮六服諸侯有一歲一見者二歲一見者三歲一見者與此不合要之周禮首末未備周公未成也

蕙田案尚書六年一朝周禮以服數來朝二者不同孔疏謂成周時自有二法元儒朱升作旁訓復據書以疑周禮竊恐未然蓋叔向所言本無年數其年數皆係解左傳者臆度之詞孔氏據以當六年之說未可信也至大

行人所云見者與十二年一巡守之文緊緊承接明係朝之正禮今欲伸尚書而強指為因貢而見之變禮大宗伯所云會同即大行人之所謂時會殷同明係在朝宗覲遇之外今欲牽合尚書而遂指為朝之常法此皆偏曲之見也蘇子瞻云一朝畢朝也朝以遠近為疏數六年而徧五服畢朝也此說最為明了蓋尚書周禮本無二法先儒不得其說強生分別皆非也詳見賓禮

又案以上十二年巡狩之期

辨鄭氏夏殷六年一巡狩

孔穎達禮記正義案鄭志孫皓問鄭答云唐虞之時五載一巡守夏殷之時天子益六年一巡守六年者取半一歲之律呂也

蕙田案唐虞巡守之期見於尚書周巡守之

期見於周禮夏殷之制不見於經其云六年者康成臆度之言耳孔氏又從而爲之說以爲取律呂之半則更無據

觀承案康成夏殷六年巡狩之說未可謂無據也唐虞五載一巡狩固是五年周禮又六年王乃時巡固是十二年然先曰六年五服一朝明是六年之中五服已徧朝此年原是一年巡狩之常期但係夏殷之禮周時已不能行故特空此一年而後曰又六年王乃時巡是前六年雖屆其期而不行直至又六年而乃行耳此猶唐虞建官惟百夏商官倍則二百故夏殷六年一巡狩周禮倍之則又六年也蓋唐虞分方朝覲羣后四朝須四年而

徧故第五年乃時巡夏殷既分五服咸建五長須五年而徧故第六年而後時巡此細玩經文而可得者鄭說不爲無據也然如孔氏謂取律呂之半則不免附會耳

易復卦象曰雷在地中復先王以至日閉關商旅不行后不省方

胡氏曰舜以十一月朔巡狩而此言后不省方則知巡狩者是月也不省方者是月之至日也

書舜典歲二月東巡守至于岱宗五月南巡守至于南岳八月西巡守至于西岳十有一月朔巡守至于北岳

歸格于藝祖

注諸侯爲天子守土故稱守巡行之岱宗泰山爲四岳所宗南岳衡山自東岳南巡五月至西岳華山北岳恒山巡守四岳然

後歸告至文祖之廟藝文也言祖則考著一疏爾雅泰山爲東岳此巡守至于岱岱與泰山有二名也風俗通云泰山山之尊者岱始也宗長也萬物之始陰陽交代故爲五岳之長釋山云河南華河東岱河北恒江南衡又云泰山爲東岳華山爲西岳霍山爲南岳恒山爲北岳岱與泰衡與霍皆一山有二名也張揖云天柱謂之霍山漢書地理志云天柱在廬江濠縣則霍山在江北而與江南衡爲一者郭璞云霍山在廬江濠縣漢武帝以衡山遠曠故移其神于此今其彼土俗人皆

呼之為南岳南岳本自以兩山為名非從近來也而學者多以霍山不得為南岳又云漢武帝來始乃名之即如此言謂武帝在爾雅前乎斯不然矣是解衡霍二名之由也四巡之後乃云歸格則是一出而周四岳故知自東岳而即南行以五月至也王者順天道以行人事故四時之月各當其時之中故以仲月至其岳鄭元以為每岳禮畢而歸仲月乃復更去若如鄭言當于東巡之下即言歸格後以如初包之何當北巡之後始言歸乎且若來而復去計程不得周徧此事必不然也

禮記王制歲二月東巡守至于岱宗五月南巡守至于南嶽八月西巡守至于西嶽十有一月北巡守至于北

嶽歸假于祖禰在岱宗東嶽假至也疏巡守皆以夏之仲月者以律歷故用四仲也孔注尚書自東嶽南巡五月至則是從東嶽而去鄭注云每歸假于祖言每歸似嶽別一歸若嶽別一歸而更去便是路遠無由可至

辨崔氏一年巡一嶽

崔氏靈恩曰唐虞五載巡狩一岳二十年方徧四岳周則四十八年矣若一出四岳皆徧且闕四時祭享唐虞衡山為南岳周氏霍山為南岳其祭吉行五十里若以二月到東岳五月到南岳八月到西岳十一月到北岳路遠固必不及此知每至一岳即歸義為長

杜氏佑曰梁崔靈恩三禮義宗云唐虞五載巡狩一岳二十年方徧四岳周則四十八年矣案尚書周官

篇云六年五服一朝又六年王乃時巡考制度諸侯各朝於方岳大明黜陟又案堯舜簡儉嘗稱苾茨土階巡狩四方羽儀導從必少一年四岳五載復往宗廟享祭暨委有司展義省方觀風察俗之大政如或二十年方徧及於民物不亦乖疎詳周官本文與孔氏注解既改制十有二載比唐虞已甚遐闊如四十八年乃徧豈非益為曠邈乎且周雖尚文天子諸侯降殺以兩穆王巡歷天下萬姓不甚勞苦始皇遊幸四方屬車八十一乘二漢以降至于有隋或東封告成或觀省風俗百辟悉至羣司畢從不下十餘萬人何止千乘萬騎所以曠代多闕斯禮崔生謂堯舜及周帝王行幸車徒禮數與秦漢以後無異斯不達古今豐約之別復不詳周官之文輒肆臆度之說耳

呂氏祖謙曰舜典王制明言二月東巡五月南巡八月西巡十一月北巡而崔靈恩乃以為一年巡一嶽虞五載則二十年而徧周十二載則四十八年而徧不知何據

馬氏端臨曰案舜典王制明言二月東巡五月南巡八月西巡十一月北巡而崔靈恩乃以為一年巡一嶽何所據耶古帝王之巡狩所以省方觀民初非游適然舜之時五載僅能一行至周成王則又不能如舜至於十二年乃一行之又必止以四岳為底止之地蓋雖一本於憂民之心而尚恐有煩民之事故出必有期而行必有方如此

間見後錄舜一歲而巡四岳南方多暑以五月之暑而南至衡山北方多寒以十一月之寒而至常山世頗疑之

蕙田案舜典歸格藝祖王制歸假祖禩其文

皆承四巡之後本無可疑鄭康成創為每巡一岳歸而復往之說崔靈恩知其說之不可通而強欲回護遂謂五載一巡止至一岳若徧周四岳須二十年謬矣諸儒駁之甚當又案每巡皆用夏時中月易稱至日不省方非謂十一月不省方原竝行不悖若邵氏之聞見後錄乃因仲夏盛暑不宜至衡山炎熱之地仲冬苦寒不當至恒山冰雪之區是以常情之偷惰窺測聖人矣又案南岳衡山本無可疑惟因爾雅釋山乃有二條前云衡山後云霍山遂滋後儒之疑郭璞回護爾雅乃云一山二名不知爾雅為後儒所亂移衡山于霍山漢武帝事後一條

五嶽真經卷之三 巡狩

明屬漢儒附益其文耳本朝宿松朱書字綠作南岳辨一卷謂衡山僻遠斷無時巡之理因謂經文衡山即霍山也不知古聖人法天行健不敢自暇自逸舜至九疑禹臨會稽何嘗以其僻遠而畏遠行耶

右巡狩之期

又案以上論巡狩分至四岳之期
書舜典歲二月東巡守至于岱宗柴望秩于山川肆觀東后協時月正日同律度量衡修五禮五玉三帛二生一死贄如五器卒乃復五月南巡守至于南岳如岱禮八月西巡守至于西岳如初十有一月朔巡守至于北岳如西禮歸格于藝祖用特

疏舜既班瑞羣后即以其歲二月東行巡省守土之諸侯至于岱宗之嶽燔柴志至又望而以秩次祭于其方岳山川柴望既畢遂以禮見東方諸侯諸國之君既歸乃歸京師至于文祖之廟用特牛設祭以告巡守歸至也王者所為巡守主謂巡行諸侯故言諸侯為天子守土故稱守而往巡行之

蔡氏沈曰歲二月當巡守之年二月也

文中子叔恬曰舜一歲而巡五嶽國不費而民不勞何也曰無他道也兵衛少而徵求寡也

敷奏以言明試以功車服以庸

蔡氏沈曰敷陳奏進也周禮曰民功曰庸程子曰敷奏以言者使各陳其為治之說言之善者則從而明考其功有功則賜車服以旌異之其言不善則亦有以告飭之也

蕙田案此舜巡狩之實事巡行所守專以考察諸侯也

右虞巡狩之禮

路史炎帝之時后歲省方觀民設教月省時考終歲獻功

史記五帝本紀黃帝披山通道未嘗甯居東至于海
登丸山及岱宗西至于空桐登雞頭南至于江登熊
湘北逐葷粥合符釜山

路史黃帝撫萬靈度四方乘龍而四巡東薄海禪丸
山西逾隴疑筭屯南入江內涉熊湘北屆淖碣南臨
元扈乃開東苑祓中宮詔羣神授見者齋心服形以
先焉作清角樂大合而樂之鳴鶴翱翔鳳凰蔽日于
是合符于釜山以觀其會

史記五帝本紀帝顓頊北至于幽陵南至于交趾西
至于流沙東至于蟠木幽靜之物小大之神日月所
照莫不砥厲

路史帝顓頊乃乘結元之輦巡四海以甯民北曠幽
陵南拊交止西際神沙東踰蟠木四行天下周旋八

外日芒所詭靡不砥厲 帝嚳省方以齊民之物而
登封以報其政之成是以四海同風九州共貫天下
歸往而人以樂生

竹書紀年帝堯五年初巡狩四嶽

路史帝制五服均五等五國相維設四嶽八伯以典
諸侯均井邑都制鄙而臨民以十二春省耕秋省斂
宣聲教以同俗振彫瘵聽民聲觀四履之所以化其
上入其疆土地辟岐旁趨養老尊賢駿傑在位則有
慶反是則絀

通鑑前編帝堯十有二載巡狩方嶽觀于華華封人
曰嘻請祝聖人使聖人富壽多男子帝曰辭多男子
則多懼富則多事壽則多辱封人曰天生萬民必授
之以職多男子則授之職何懼之有富而使人分之

何事之有天下有道與物皆昌天下無道修德就閒
千歲厭世去而上仙乘彼白雲至于帝鄉何辱之有
通志五帝紀堯巡狩告成周流五岳存鰥寡賑荒札
一民饑則曰我饑之一民寒則曰我寒之一民罹辜
則曰我陷之故民戴之如日月愛之如父母不賞而
勸不罰而治

三齊略記堯山在廣固城西七里堯巡狩所登遂以
為名山頂立祠祠邊有柏樹枯而復生不知幾代樹
也又石上有堯跡于今猶存

蕙田案以上古巡狩附

周禮夏官職方氏王將巡守則戒于四方曰各修平乃
守考乃職事無敢不敬戒國有大刑

注乃猶汝也守謂國境之內職事所當供具
王氏昭禹曰王巡守則諸侯各朝于方岳故戒于四方守則諸侯所守之地職
事則諸侯所治之職事天子適諸侯曰巡守巡守者巡所守也故戒以修平乃

守修則使之治其壞也平則使各當其分也諸侯朝于天子曰述職述
職者述所職也故戒以考乃職事職則慮其曠職事則慮其有廢事
鄭氏錡曰因巡守之年儆戒之使修正其疆界考察其職業以俟王之
時巡告戒之有素及其不率然後待之以誅夷竄極之罪可以無愧矣
李氏嘉會曰必先警戒而後巡守者不欲乘其
不備幾于不戒而後也必先警戒則刑可施

及王之所行先道帥其屬而巡戒令

注先道先由王所從道居
前行其前日所戒之令
鄭氏錡曰及王之所行先用所嚮之方國
巡其前所布之戒令預考其率與不率也

蕙田案以上巡狩先事戒令

禮記王制天子將出類乎上帝宜乎社造乎禰

注類宜造皆
祭名疏此
論天子巡守之禮也將出謂初出時也類乎上帝祭告天也宜乎社者巡行方事
誅殺封割應載社主令誅罰得宜亦隨宜而告也造乎禰者造至也謂至父祖之
廟也前歸假既云祖禰明出亦告祖禰也今唯云禰者
白虎通云從卑不敢畱尊者之命至禰不嫌不至祖也

孔叢子巡守篇子思遊齊陳莊伯與登泰山見古天

子巡守之銘焉陳子曰敢問昔聖帝明王巡守之禮
可得聞乎子思曰古者天子將巡守必先告于祖禰
命史告羣廟及社稷圻內名山大川告者七日而徧

親告用牲史告用幣申命冢宰清道而出
 白虎通德論王者出告廟何孝子出辭反面事死如
 事生尚書歸假于祖禰曾子問曰王者諸侯出親告
 祖禰使祝徧告五廟尊親也王者將出告天者示不
 專也故王制曰類于上帝宜乎社造于禰類祭以祖
 配不曰接者尊無二禮尊尊之義造于禰獨見禰何
 辭從卑不復留尊者之命至禰不嫌不至祖即祭告
 天為告事也祖為出辭也義異告于尊者然後乃辭
 出

朱子曰古者君將出必告于祖禰歸又至其廟而告
 之孝子不忍死其親出告反面之義也
陳氏結曰類宜造皆祭名後章言天子將出征則此出為巡守也
 蕙田案以上巡狩先事行告祭

曾子問曾子問曰古者師行必以遷廟主行乎孔子曰
 天子巡守以遷廟主行載于齊車言必有尊也今也取
 七廟之主以行則失之矣

陳氏滌曰遷廟主謂新祧廟之主也齊車金輅也又名曰公禰吳氏澄曰遷廟主謂禰時所遷昭穆最上之廟一主也在昭廟穆廟之上最尊最親者也君將出行時徧告有廟之諸主又特告此無廟之一主而載之以行也

曾子問曰古者師行無遷主則何主孔子曰主命問曰
 何謂也孔子曰天子諸侯將出必以幣帛皮圭告于祖
 禰遂奉以出載于齊車以行每舍奠焉而後就舍反必
 告設奠卒斂幣玉藏諸兩階之間乃出蓋貴命也

陳氏滌曰既以幣玉告于祖廟則奉此幣玉猶奉祖宗之命也故曰主命每舍必奠神之也反則設奠以告而埋藏之不敢褻也
 百虎通德論王者諸侯出必將主何示有所尊故曾

子曰王者將出必以遷廟主行載于齊車示有尊也
無遷主以幣帛皮圭告于祖禰廟遂奉以出每舍奠
焉蓋貴命也必以遷主者明廟不可空也

蕙田案以上亦見孔叢子不複載

又案以上巡狩載主

周禮夏官戎僕掌馭戎車犯較如玉路之儀

注戎車革路也

凡巡守及兵車之會亦如之

鄭氏鈔曰出國門則跋履山川故行犯較之祭

王氏昭禹曰凡巡守則戎車從焉兵車之會亦乘戎車異于乘車之會乘金路矣

大馭掌馭玉路以祀及犯較

注行山曰較封土為山于國門之外祭之以行為祖道也

地官土訓掌道地圖以詔地事王巡守則夾王車

注道說也說地

圖九州形勢山川所宜告王以施其事也若云荆揚地宜稍幽并地宜麻巡守行視所守也天子以四海為守

呂氏溫曰見蒼梧塗山則思舜禹邠民之艱暗窮荒大漠則悟秦漢勞師之弊

明得失諸侯于此鑒幽替斯懲勸之道也

王氏昭禹曰其地異宜其民異數其穀異種王將制其職貢巡其封域而物之有無事之利害莫不知之則土訓之道地圖詔地事與有力焉

鄧氏元錫曰王體萬物不可使一物失所故博告之

誦訓掌道方志以詔觀事掌道方憲以詔辟忌以知地

俗王巡守則夾王車

注道方志說四方所識久遠之事以告王觀博古語所忌也不辟其忌則其方以為苟于言語也知地俗博事也

鄭司農云以詔辟忌不違其俗也曲禮曰君子行禮不求變俗

魏氏校曰地氣有偏不能無應天常生物解之西北多風防風獨活之屬足理

風東南多痺魚鼈螺蛭之屬足治痺江湖多氣橘柚之屬足破氣嶺海多瘴癘

檟之屬足去瘴是矣王所至恐不習水土豫求物以防患非若後世但求口腹玩好也

蕙田案鄭注以方憲為言語之忌莊渠魏氏以為食物之忌二說不同皆通

又案以上巡狩車行之儀

五禮通考卷三百五十五 巡狩

周禮夏官校人凡將事于四海山川則飾黃駒庭四海猶四方也王巡守

過大山川則有殺駒以祈沈禮與玉人職有宗祝以黃金勺前馬之禮

鄭氏謂王行所過山川設祭禮之然後去山川地神土色黃故用黃駒也

人之職或謂大宗伯以沈豕祭川澤而祭祀之牲各放其色四海山川乃均用黃駒何耶以玉人之職考之王巡守過大山川所用之璋不同然皆以黃金勺

前馬則知均用黃駒者海與山川均為地道黃者地之中色若夫用駒則以巡守而行四方駒有千里之足而行地莫如馬駒雖

馬之小者禮以小為貴飾黃駒乃郊用犢之意

冬官考工記王人大璋中璋九寸邊璋七寸射四寸厚

寸黃金勺青金外朱中鼻寸衡四寸有纁天子以巡守

宗祝以前馬注射發出者也杜子春云勺謂酒尊中勺也鄭司農云鼻謂勺

衡橫也謂勺經也三璋之勺形如圭璋天子巡守有事山川則用灌焉於大山川

則用大璋加文飾也于中山川用中璋殺文飾也于小山川用邊璋半文飾也其

祈沈以馬宗祝亦執勺以先之禮王過大山川則太祝用事焉將有事於四海山

川則校人飾黃駒疏此經說王巡守出行過山川禮敬之事三璋據為勺柄黃

金勺以下據為勺頭山川地神故用黃駒也

林氏曰宗主禮者祝通神者

孔叢子巡守所經五岳四瀆皆有牲幣

蕙田案以上巡狩所經岳瀆

禮記祭義王者巡守諸侯待于境

白虎通德論王者巡守諸侯待于境何諸侯以守蕃

為職也故待于境

蕙田案此條亦見孔叢子不復載

又案以上巡狩諸侯待境

王制東巡守至于岱宗柴而望祀山川往柴祭天告至也疏謂燔柴以祭上天而告

至其祭天之後乃望祀山川所祭之天則蒼帝靈威仰

方氏慤曰天之高也故燔柴以上達山川之遠故望而祀之皆告至也神祇眾矣止以山川蓋諸侯祭名山大川之在其地者其所守山川為大也天曰神地

曰祇此以山川者其無所屈皆可謂神其無所別皆可謂祇也

郊特牲天子適四方先柴

周氏謂曰天子巡狩至于四嶽先柴以告天也

禮器因天事天因地事地因名山升中于天

五嶽四瀆之是巡狩

左

陳氏語曰名猶大也升上也中猶成也謂巡守至于方嶽燔柴祭天告以諸侯之成功也

曲禮臨諸侯畛于鬼神曰有天王某甫

陳氏語曰天子巡狩而至諸侯之國必使祝史致鬼神當祭者之祭以不親往故祝辭稱字曰某甫甫者丈夫之美稱也

方氏慈曰望秩之禮必于野外故以畛言之畛田間道也祭于畛而謂之畛猶祭于郊而謂之郊也天子適諸侯非其常蓋有時矣故于是特言有焉

詩周頌序時邁巡狩告祭柴望也

時邁其邦昊天其子之實右序有周薄言震之莫不震

屢懷柔百神及河喬嶽允王維后明昭有周式序在位

載戢干戈載橐弓矢我求懿德肆于時夏允王保之

朱子集傳周制十有二年王巡狩殷國柴望祭告諸侯畢朝此巡守而朝會祭告之樂歌也

般巡狩而祀四岳河海也

於皇時周陟其高山墮山喬岳允猶翕河敷天之下哀

時之對時周之命

朱子集傳言美哉此周也其巡狩而登此山以柴望又道于河以周四岳凡以敷天之下莫不有望於我故聚而朝之方岳之下以答其意耳

曹氏曰時邁為武王巡守之頌則般頌成王矣

蕙田案以上巡狩柴望

周禮天官掌舍掌王之會同之舍設棊柅再重設車宮

轅門為壇壝宮棘門為帷宮設旌門無宮則其人門凡

舍事則掌之

夏官土方氏王巡守則樹王舍

易氏祓曰樹植也立也王巡守則有四方之舍土方氏既為之土地相宅而知利害之所在然後掌舍為之設棊柅再重為車宮轅門為壇壝宮棘門而土方氏植立之焉

蕙田案以上巡狩設舍

禮記王制覲諸侯

禮云諸侯覲于天子為宮方三百步四門墼十有二尋

五禮通考卷之三十一 巡狩

七

深四尺鄭注云王巡守至于方嶽之下諸侯會之亦為此宮以見之是也觀禮又云天子乘龍載大旂拜日于東門之外反祀方明鄭注引朝事儀曰天子冕而執鎮圭尺有二寸云帥諸侯而朝日于東郊所以教尊尊也退而朝諸侯由此二者言之已祀方明乃以會同之禮見諸侯也凡會同者不協而盟盟時設方明於壇上乃以載辭告焉如觀禮及鄭注所云既告至之後為宮加方明於壇天子出宮東門外拜日反祀方明視方明之後乃徹去方明故鄭云由此二者言之已祀方明乃以會同之禮見諸侯云由云此二者謂觀禮經文朝日東門反祀方明朝事儀云朝日東郊退而朝諸侯故云由此二者言之已祀方明乃以會同之禮見諸侯也非於觀禮未祀方明之前未有見諸侯之事皇氏以為未祀方明之前已見諸侯非也其祀方明之後見諸侯之時王立于壇上南面諸公中階之前北面諸侯東階之東西面諸伯西階之西東面諸子門東北面諸男門西北面王降階南面而見之三揖既升壇使諸侯升公拜于上等侯伯于中等侯子于下等侯諸侯訖若有不協更加方明於壇上諸侯等俱北面戎右傳敦血以授敵者司盟主其職故司盟云掌其盟約之載及其禮儀北面詔明神于時王立無文不可與諸侯同北面當於階上西面此是見諸侯之禮祀方明之時祭天則燔柴也天謂日也與此岱宗柴所用事別觀禮云祭天燔柴謂天子之盟也祭地燔柴謂王之伯盟也祭山邱陵升及祭川沈者是謂王巡守及諸侯之盟祭也祭天柴謂祭日也祭地瘞沈必就祭者也就祭則是謂王巡守及諸侯之盟祭也祭天柴謂祭日也祭地瘞者祭月也王巡守之盟其神主日諸侯之盟其神主山川則王官之伯會諸侯而盟其神主月與今此王制所主岱宗柴者謂祭天告至而觀禮注引王制云王巡守至于岱宗柴是王巡守之盟其神主日又以柴為盟之所用不同者告至與盟必非一事鄭意證巡守盟時有柴故引岱宗以證之其實別也觀禮云為宮即言加方明經文相連鄭注云王巡狩至于方嶽之下諸侯會之亦為此宮則亦有方明但文不具耳故巡守祭天燔柴祭地瘞埋皆是祭方明也故鄭於方明設六玉之下注云上宜以蒼璧下宜以黃琮而不以者則上下之神非天地之至貴者也以此言之明天子巡守之祭有方明也而皇氏云諸侯來就王會同有方明王巡

守見諸侯無方明皇氏用之為說其義非也

周禮秋官司儀掌九儀之賓客擯相之禮以詔儀容辭

令揖讓之節將合諸侯則令為壇三成宮旁一門注合諸侯謂有

異姓天揖同姓及其擯之各以其禮公於上等侯伯於

中等子男於下等其將幣亦如之其禮亦如之

王氏曰古者天子巡守諸侯入朝一皆為壇於國門之外加方明焉天子示之蓋以為盟尸也此云合諸侯者謂大會同耳巡守之制亦如其會同但會同為壇于國門之外而巡守為壇于方嶽之下耳有事而會不協而盟此壇之所作也其制為壇三成即觀禮所云深四尺者是也蓋從下向上為深發地一尺上有三成則總四尺矣宮旁一門即觀禮所謂宮方三百步四門是也蓋壇土為壇壇外為宮每旁一門則四門矣馬氏端臨曰天子與諸侯相見於方嶽之下築壇與觀禮壇制同其壇外為土埒方三百步開四門壇方九十六尺高四尺上為堂下為三等謂之三成成每等高一尺其堂上置司盟之神位謂之方明見諸侯之時據鄭注司儀及觀禮諸侯之上介各以其君之旂置于宮內以表立位之處乃詔王升壇訖諸侯皆就其旂而立其位鄭案明堂位諸公中階之前北面東上諸侯阼階之東西面北上諸伯西階之西東面北上諸子門東北面西上諸男門西北面東上王乃於壇上揖之以定其位其揖之節有三儀與王無親者推手小下之與王婚姻之親者平推手揖之與王同姓者推手小舉之王既揖定其位諸侯乃進升壇

五禮通考卷之三十一 巡狩

七

莫玉又案司儀職及鄭注云公於上等莫桓珪王陳擯者五人禮之侯伯於中等莫信珪躬珪王陳擯者四人禮之于男於下等莫穀璧蒲璧王陳擯者三人禮謂之將幣諸侯既朝見王訖乃退而自相與盟王官之伯臨之其神主於月必因以祭之

蕙田案巡守見諸侯其儀多與覲禮同學者當互參之

又案以上巡狩觀諸侯

百虎通德論王者巡狩必舍諸侯祖廟何明尊無二上也故禮坊記曰君適其臣升自阼階示不敢有其室也禮曰天子適諸侯必舍其祖廟王者出一公以其屬守二公以其屬從也

蕙田案此禮不見于經亦有可疑姑存之又案以上巡狩舍諸侯祖廟

掌客掌四方賓客之牢禮餼獻飲食之等數與其政治

王巡守殷國則國君膳以牲擯令百官百姓皆具從者

三公眡上公之禮卿眡侯伯之禮大夫眡子男之禮士

眡諸侯之卿禮庶子壹眡其大夫之禮注政治邦新殺禮之屬國君者王所過之國君也擯爾栗之禮也以膳天子貴誠也性孕天子不食也祭帝不用也凡賓客則皆角尺令者掌客令主國也百姓皆具言無有不具備 疏王巡守則殷同殷同則殷國也王巡守至于四嶽之下當方諸侯或所在經過或至方岳之下若殷國或在王城出畿外在諸侯之國所在之處皆設禮待王故巡守殷國並言也

易氏被曰牢禮即凡用牢之禮餼謂餼九牢之類獻謂禽獻之類飲食謂享燕膳食之類

禮記郊特牲天子適諸侯膳用擯貴誠之義也

陳氏澹曰擯未有牲牲之情故云貴其誠意

蕙田案以上巡狩諸侯致膳牲

王制問百年者就見之注就見老人 疏此謂到方岳之下見諸侯之後問百年者就見之若未至方岳于道路上有

百年者則王亦先見之

祭義天子巡守諸侯待于竟天子先見百年者注問其國君在而往

八十九者東行西行者弗敢過西行東行者弗見之

敢過欲言政者君就之可也注弗敢過者謂道經之則見之疏此一節明尚齒貴老之義八十九十者未滿百歲不可一一就見若天子諸侯因其行次或東行西行至八十九十者間里之旁不敢過越而去必往就見之欲言政君就之者謂八十九十之人雖不當道路左右亦當共言論政教往就之可也

應氏鏞曰彼向東此向西彼西行此趨東是相違而不相值然必駐行反迂謁而見之不敢超越經過也

蕙田案以上巡狩見老人

王制命太師陳詩以觀民風命市納賈以觀民之所好

惡志淫好辟注陳詩謂采其詩而視之市與市者賈謂物貴賤厚薄也質則用物賈淫則侈物貴民之志淫邪則其所好者不正疏太師是掌樂之官令各陳其國風之詩以觀君政之善惡命市之官進納物賈之書以觀民所好惡若民志淫邪則好邪僻之物由在上教之不正此以民俗知君上善惡也

蕙田案以上巡狩觀察風俗

命典禮考時月定日同律禮樂制度衣服正之注同陰律也疏典禮之官於周則太史也考校四時及十一月之大小時有節氣早晚月有弦望晦朔考之使各當其節又正定甲乙之日陰管之同陽管之律玉帛之禮鐘鼓之樂及制度衣服各有等差當正之使正云同陰律者鄭以先儒以同為齊同此律故辨之太師云執同律以聽軍聲又典同律云同陰律也不以陽律名言者因其先言耳

蕙田案陸氏釋文載王肅尚書注以同為齊

孔疏因之康成以同為陰律二說不同穎達

作禮記疏即與書疏異解似王說較直捷

又案以上巡狩考正制度

山川神祇有不舉者為不敬不敬者君削以地宗廟有

不順者為不孝不孝者君紕以爵變禮易樂者為不從

不從者君流革制度衣服者為畔畔者君討有功德于

民者加地進律注舉猶祭也不順者謂若逆昭穆流放也討誅也律法也疏文二年秋八月丁卯大事于太廟躋僖公逆祀也左傳曰夏父弗忌為宗伯曰吾見新鬼大故鬼小先大後小順也于是躋僖公于閔公之上是逆昭穆也

陳氏澹曰律者爵命之等加地而進之所以示勸也

蕙田案以上巡狩賞罰黜陟

南巡狩如東巡狩之禮西巡狩如南巡狩之禮北巡狩

如西巡狩之禮歸格于祖禰用特注假至也特特牛也祖下及禰皆一牛

程子曰但止就祖廟共用一牛不如時祭各于其廟也

呂氏祖謙曰巡狩而歸苟民物有一不得其所其見祖廟有愧心矣想先王歸格之時此心無愧對越在廟慰愜可知也陳氏絳曰假至也歸至京師即以特牛告至于祖廟之廟

蕙田案尚書但言祖禮記兼言禩文有詳略其禮一也

孔叢子巡守歸反舍于外次三日齋親告于祖禩用特命有司告羣廟社稷及圻內名山大川而後入聽朝

蕙田案以上巡狩歸告廟

竹書紀年武王十五年初巡方岳誥于沫邑

通鑑前編武王十有五年春巡狩方岳祀百神朝諸侯

書周官惟周王撫萬邦巡侯甸四征弗庭綏厥兆民六服羣辟罔不承德歸于宗周

通鑑前編成王十有二年巡狩朝諸侯于方岳因行黜陟之典

竹書紀年成王十九年王巡狩侯甸方岳召康公從歸于宗周遂正百官黜豐侯

康王十六年王南巡守至九江廬山

通典昭王德衰南巡濟于漢船人惡之以膠船進王王御船至中流膠液船解王及祭公俱沒于水而崩其右卒游靡長臂且多力游得王周人諱之

穆天子傳周穆王守滲澤得白狐元貉以濟河宗得驥溫驪駮耳之駟西巡守樂而忘歸

蕙田案穆天子傳文多荒誕未必紀實其事

亦見史記秦本紀今存其略不詳及

竹書紀年宣王八年巡狩東都

朱子詩車攻集傳周公相成王營洛邑爲東都以朝諸侯周室既衰久廢其禮至于宣王內修政事外攘夷狄復文武之境土修車馬備器械復會諸侯于東都因田獵而選車徒焉故詩人作此以美之

春秋莊公二十一年左氏傳夏五月王巡虢守虢公爲王宮于珺王與之酒泉鄭伯之享王也王以后之鞶鑑與之虢公請器王子之爵鄭伯由是始惡于王冬王歸自虢

春秋僖公二十有八年冬天王狩于河陽左氏傳是會也晉侯召王以諸侯見且使王狩仲尼曰以臣召君不可以訓故書曰天王狩于河陽言非其地也

且明德也

史記周本紀二十年晉文公召襄王襄王會之河陽踐土諸侯畢朝書諱曰天王狩于河陽

蕙田案周禮所載周巡狩之儀甚詳其他禮記王制及見于各傳記者或兼夏殷巡狩之典然別無所考今統入周制

右周巡狩之禮

五禮通考卷第一百七十八

五禮通考卷第一百七十九

內廷供養禮部右侍郎金匱秦惠編輯

翰林院編修嘉慶王鳴盛

李天保總纂嘉慶桐城方觀承同訂

直隸按察司副使元和宋完 參校

嘉禮五十二

巡狩

史記秦始皇本紀始皇二十七年巡隴西北地出雞頭
 山過回中焉賜爵一級治馳道應邵曰馳道天子道也若今之中道然二十八
 年始皇東行郡縣上鄒嶧山立石遂上泰山立石禪梁
 父刻所立石乃並勃海以東過黃腫窮成山登之罘立
 石頌秦德焉而去南登瑯琊大樂之留三月乃徙黔首
 三萬戶瑯琊臺下復十二歲作瑯琊臺立石頌德還過
 彭城齋戒禱祠欲出周鼎泗水使千人沒水求之弗得
 乃西南渡淮水之衡山南郡浮江至湘山祠自南郡由

武關歸 二十九年始皇東遊登之罘刻石之瑯琊道
上黨入 三十二年始皇之碣石刻碣石門巡北邊從
上郡入 三十七年始皇出遊行至雲夢望祀虞舜於
九疑山浮江下觀籍柯渡海渚過丹陽至錢唐臨浙江
水波惡乃西百二十里從狹中渡上會稽祭大禹望於
南海而立石刻頌秦德還過吳從江乘渡並海上北至
瑯琊自瑯琊北至榮成山至之罘並海西至平原津
二世元年東行郡縣到碣石並海南至會稽而盡刻始
皇所立刻石遂至遼東而還

右秦

漢書高祖本紀高祖二年冬十月如陝鎮撫關外父老
文帝本紀三年夏五月上幸甘泉自甘泉之高奴因幸
太原見故羣臣皆賜之舉功行賞諸民里賜牛酒復晉

陽中都民三歲租留游太原十餘日秋七月上自太原

至長安 十年冬行幸甘泉 十一年冬十一月行幸

代春正月上自代還 十五年夏四月上幸雍

景帝本紀景帝中六年冬十月行幸雍

武帝本紀武帝元光二年冬十月行幸雍 六年夏六

月行幸雍

元狩元年冬十月行幸雍

元鼎四年冬十月行幸雍賜民爵一級女子百戶牛酒

行自夏陽東幸汾陰十一月行幸滎陽還至洛陽 五

年冬十月行幸雍遂踰隴登空同西臨祖厲河而還

元封元年冬十月詔曰南越東甌咸伏其辜西蠻北夷

頗未輯睦朕將巡邊垂擇兵振旅躬秉武節置十二部

將軍親帥師焉行自雲陽北歷上郡西河五原出長城

北登單于臺至朔方臨北河勒兵十八萬騎旌旗徑千
餘里威震匈奴還祀黃帝於橋山迺歸甘泉春正月行
幸緱氏遂東巡海上夏四月癸卯上還登封泰山降坐
明堂詔行所巡至博奉高蛇邱歷城梁父民田租逋賦
貸已除加年七十以上孤寡帛人二匹四縣無出今年
算賜天下民爵一級女子百戶牛酒行自泰山復東巡
海上至碣石自遼西歷北邊九原歸於甘泉 二年冬
十月行幸雍春幸緱氏遂至東萊夏四月還至瓠子臨
決河命從臣將軍以下皆負薪塞河隄作瓠子之歌赦
所過徒賜孤獨高年米人四石 四年冬十月行幸雍
通回中道遂北出蕭關歷獨鹿鳴澤自代而還幸河東
春三月詔赦汾陰夏陽中都死罪以下賜三縣及楊氏
皆無出今年租賦 五年冬行南巡狩至于盛唐登灃

天柱山自尋陽浮江親射蛟江中獲之舳艫千里薄樅
陽而出作盛唐樅陽之歌遂北至瑯琊並海所過禮祠
其名山大川春三月還至泰山增封因朝諸侯王列侯
受郡國計夏四月詔赦天下所幸縣毋出今年租賦賜
鰥寡孤獨帛貧窮者粟還幸甘泉 六年冬行幸回中
春作首山宮三月行幸河東

太初元年冬十月行幸泰山十二月禮高里東臨勃海
望祠蓬萊春還受計于甘泉 三年春正月行東巡海
上

天漢元年春正月行幸甘泉三月行幸河東 二年春
行幸東海還幸回中 三年春三月行幸泰山還幸北
地夏四月赦天下行所過毋出田租
太始二年春正月行幸回中 三年春正月行幸甘泉

宮亭外國客二月令天下大酺五日行幸東海獲赤雁
作朱雁之歌幸瑯琊禮日成山登之眾浮大海山稱萬
歲冬賜行所過戶五千錢鰥寡孤獨帛人一匹 四年
春三月行幸泰山夏四月幸不其祠神人於交門宮若
有鄉坐拜者作交門之歌五月還幸建章宮大置酒赦
天下十二月行幸雍西至安定北地
征和三年春正月行幸雍至安定北地 四年春正月
行幸東萊臨大海三月上耕于鉅定還幸泰山夏六月
還幸甘泉
後元元年春正月行幸甘泉遂幸安定
宣帝本紀神爵元年春正月行幸甘泉三月行幸河東
元帝本紀永光五年冬上幸長楊射熊館
成帝本紀永始四年春正月行幸甘泉三月行幸河東

蕙田案王莽傳載天鳳元年莽巡狩事今削
不錄

右漢

後漢書世祖本紀建武三年冬十月壬申幸春陵置酒
舊宅大會故人父老十一月乙未至自春陵 四年夏
四月丁巳幸鄴己巳進幸臨平五月進幸元氏辛己進
幸盧奴六月辛亥車駕還宮七月丁亥幸譙八月戊午
進幸壽春冬十月甲寅車駕還宮十一月丙申幸宛十
二月丙寅進幸黎邱 九年夏六月丙戌幸緱氏登轅
轅 十七年夏四月乙卯南巡狩皇太子及右翊公輔
楚公英東海公陽濟南公康東平公蒼從幸潁川進幸
葉章陵五月乙卯車駕還宮 十八年春二月甲寅西
巡狩幸長安 十九年秋九月南巡狩壬申幸南陽進

幸汝南南頓縣舍置酒會賜吏人復南頓田租歲父老
前叩頭言皇考居此日久陛下識知寺舍每來輒加厚
恩願賜復十年帝曰天下重器常恐不任日復一日安
敢遠期十歲乎吏人又言陛下實惜之何言謙也帝大
笑復增一歲進幸淮陽梁沛 二十年春二月戊子車
駕還宮冬十月東巡狩甲午幸魯進幸東海楚沛國十
二月壬寅車駕還宮復濟陽縣徭役六歲 三十年春
二月東巡狩甲子幸魯進幸濟南閏月癸丑車駕還宮
秋七月丁酉幸魯國復濟陽縣是年徭役冬十一月丁
酉至自魯
中元元年春正月丁卯東巡狩二月己卯幸魯進幸秦
山北海王興齊王石朝於東岳夏四月癸酉車駕還宮
己卯改年爲中元行幸長安戊子祀長陵五月乙丑至

自長安

明帝本紀永平二年冬十月甲子西巡狩幸長安歷覽
館邑會郡縣吏勞賜作樂十一月進幸河東所過賜二
千石令長以下至於掾史各有差矣卯車駕還宮 五
年冬十月行幸鄴與趙王栩會鄴 六年冬十月行幸
魯會沛王輔楚王英濟南王康東平王蒼淮南王延瑯
琊王京東海王政十二月還幸陽城壬午車駕還宮
十年夏閏四月甲午南巡狩幸南陽日北至又祠舊宅
禮畢召校官弟子作雅樂奏鹿鳴帝自御塤籥和之以
娛嘉賓還幸南頓勞享三老官屬冬十月徵淮陽王延
會平輿徵沛王輔會睢陽十二月甲午車駕還宮 十
三年夏四月辛巳行幸滎陽巡幸河渠乙酉詔曰今五
土之宜反其正色濱渠下田賦與貧人無令豪右得固

五禮通考卷之七 巡狩 五

其利因遂渡河登太行進幸上黨壬寅車駕還宮 十
五年春二月庚子東巡狩辛丑幸偃師徵沛王輔會睢
陽進幸彭城癸亥帝耕于下邳三月徵瑯琊王京會良
成徵東平王蒼會陽都又徵廣陵侯及其三弟會魯還
幸孔子宅親御講堂命皇太子諸王說經又幸東平辛
卯進幸大梁至定陶夏四月庚子車駕還宮
章帝本紀建初七年秋九月甲戌幸偃師東涉卷津至
河內下詔曰車駕行秋稼觀收穫因涉郡界皆精騎輕
行無它輜重不得輒修橋道遠離城郭遣吏逢迎刺探
起居出入前後以爲煩擾動務省約但患不能脫粟瓢
飲耳所過欲令貧弱有利無違詔書遂覽淇園己酉進
幸鄴勞享魏郡守令以下至于三老門闌走卒賜錢各
有差勞賜常山趙國吏人復元氏租賦三歲辛卯車駕

還宮冬十月癸丑西巡狩幸長安進幸槐里岐山得銅
器形似酒罇獻之又獲白鹿帝曰上無明天子下無賢
方伯人之無良相怨一方斯器亦曷爲來哉又幸長平
御池陽宮東至高陵造舟于涇而還每所到幸輒會郡
縣吏人勞賜作樂十一月詔勞賜河東守令掾以下十
二月丁亥車駕還宮 八年冬十二月甲午東巡狩幸
陳留梁國淮陽潁陽戊申車駕還宮
元和元年秋八月丁酉南巡狩詔所經道上郡縣無得
設儲峙命司空自將徒支柱橋梁有遣使奉迎探知起
居二千石當坐其賜鰥寡孤獨不能自存者粟人五斛
九月辛丑幸章陵祠舊宅園廟見宗室故人賞賜各有
差冬十月己未進幸江陵還幸宛十一月己丑車駕還
宮賜從者各有差 二年春二月丙辰東巡狩乙丑帝

耕于定陶詔曰三老尊年也孝悌淑行也力田勤勞也
 國家甚休之其賜帛人一匹勉率農功辛未幸太山進
 幸奉高癸酉大會內外羣臣丙子詔大赦天下諸犯罪
 不當得赦者皆除之復博奉高嬴無出今年田租芻橐
 戊寅進幸濟南三月己丑進幸魯壬辰進幸東平乙未
 幸東阿北登太行山至天井關夏四月乙卯車駕還宮
 張酺傳顯宗置五經師酺以尚書教授數講于御前
 遂令入授皇太子及肅宗即位數月出為東郡太守
 元和二年東巡狩幸東郡引酺及門生并郡縣掾史
 並會庭中帝先備弟子之儀使酺講尚書一篇然後
 修君臣之禮賞賜殊特莫不沾洽

元和三年春正月丙申北巡狩濟南王康中山王焉西
 平王羨六安王恭樂成王黨淮陽王昞任城王尚沛王

定皆從辛丑帝耕于懷二月壬寅告常山魏郡清河鉅
 鹿平原東平郡太守相曰朕惟巡狩之制以宣聲教考
 同遐邇解釋結寃也今四國無政不用其良駕言出游
 欲親知其劇易前祠園陵遂望祀華霍東柴岱宗為人
 祈福今將禮常山遂徂北土歷魏郡經平原升踐隄防
 詢訪耆老咸曰往者汴門未作深者成淵淺則泥塗追
 惟先帝勤人之德底績遠圖復禹宏業聖跡滂流至于
 海表不克堂構朕甚慙焉月令孟春善相邱陵土地所
 宜今肥田尚多未有墾闢其悉以賦貧民給與糧種務
 盡地力勿令游手所過縣邑聽半入今年田租以勸農
 夫之勞乙丑敕侍御史司空曰方春所過無得有所伐
 殺車可以引避引避之駢馬可輟解輟解之詩云敦彼
 行葦牛羊勿踐履禮人君伐一草木不時謂之不孝俗

知順人莫知順天其明稱朕意戊辰進幸中山出長城
癸酉還幸元氏三月丙子詔復元氏七年徭役已卯進
幸趙辛卯車駕還宮賜從行者各有差八月乙丑幸安
邑觀鹽池九月至自安邑

章和元年秋八月癸酉南巡狩甲申徵任城王尚會睢
陽戊子幸梁乙未幸沛徵會東海王政九月庚子幸彭
城東海王政沛王定任城王尚皆從辛亥幸壽春己未
幸汝陰冬十月丙子車駕還宮

和帝本紀永元三年冬十月癸未行幸長安 十五年
九月壬午南巡狩清河王慶濟北王壽河開王開並從
賜所過二千石長吏以下三老官屬及民百年者錢帛
各有差冬十月戊申幸章陵癸丑會宗室于舊廬勞賜
作樂戊午進幸雲夢臨漢水而還十一月甲申車駕還

宮賜從臣及留者公卿以下錢帛各有差

張禹傳永元十五年南巡祠園廟禹以太尉兼衛尉
留守聞車駕當進幸江陵以為不宜冒險遠驛馬上
諫詔報曰祠謁既訖當南禮大江會得君奏臨漢回
輿而旋及行還禹特蒙賞賜

十六年十一月己丑行幸緱氏登百岷山賜百官從臣
布各有差

安帝本紀延光三年春二月丙子東巡狩辛卯幸泰山
齊王無忌北海王普樂安王延來朝癸巳勞賜郡縣作
樂三月戊戌還幸東平至東郡歷魏郡河內壬戌車駕
還京師冬十月行幸長安丁亥會三輔守令掾吏于長
安作樂閏月乙未歷觀上林昆明池十一月乙丑至自
長安 四年春二月甲辰南巡狩

順帝本紀永和二年冬十月甲申行幸長安所過鰥寡
孤獨貧不能自存者賜粟人五斛庚子幸未央宮會三
輔郡守都尉及官屬勞賜作樂十二月乙亥至自長安
桓帝本紀延熹二年冬十月壬申行幸長安乙酉幸未
央宮十二月己巳至自長安賜長安民粟人十斛行所
過縣三斛 七年冬十月壬寅南巡狩庚申幸章陵賜
守令以下各有差戊辰幸雲夢臨漢水還幸新野十二
月辛丑車駕還宮
靈帝本紀光和五年冬十月校獵上林苑歷函谷關遂
巡狩于廣成苑

右後漢

三國魏志文帝本紀黃初二年冬十二月行東巡 三
年春正月庚午行幸許昌宮三月甲午行幸襄邑夏四

月癸亥行還許昌宮冬十一月辛丑幸宛 四年春正
月築南巡臺于宛三月丙申行自宛還洛陽宮秋八月
辛未東巡九月甲辰行幸許昌宮

晉書禮志黃初四年七月帝將東巡以大軍當出使
太常以一特牛告祠南郊

五年秋七月行東巡幸許昌宮八月為水軍親御龍舟
循蔡潁浮淮幸壽春揚州界將吏士民犯五歲刑以下
皆原除之九月遂至廣陵赦青徐二州改易諸將守冬
十月乙卯行還許昌宮 六年春二月遣使者巡行許
昌以東盡沛郡問民所疾苦貧者振貸之三月行幸召
陵通討虜渠乙巳還許昌宮辛未帝為舟師東征五月
戊申幸譙八月帝遂以舟師自譙循渦入淮從陸道幸
徐九月築東巡臺冬十月行幸廣陵故城臨江觀兵戎

卒十餘萬旌旗數百里是歲大寒水道冰舟不得入江乃引還十二月行自譙過梁

明帝本紀太和四年八月辛巳行東巡乙未幸許昌宮十月乙卯行還洛陽宮

晉書禮志魏明帝凡三東巡狩所過存問高年恤疾苦或賜穀帛齊王正始元年巡洛陽縣賜高年力田各有差

右魏

晉書武帝本紀泰始四年六月甲申朔詔曰郡國守相三載一巡行屬縣必以春此古者所以述職宣風展義也見長吏觀風俗協禮律考度量存問耆老親見百年錄囚徒理冤枉詳察政刑得失知百姓所患苦無有遠近便若朕親臨之

通志晉初新禮巡狩方岳柴望告至設壇宮如禮諸侯之覲者賓及執贄皆如朝儀而不建旂摯虞以覲禮諸侯各建其旂章所以殊爵命示等威詩稱君子至止言觀其旂宜定新禮建旂如舊詔可然終晉代其禮不行武帝泰始四年詔使使持節侍中黃門侍郎銜命四出周行天下其萬民之利害為一書禮俗政事教理刑禁逆順為一書悖逆暴亂作慝犯令為一書札喪荒凶厄貧為一書康樂和親安平為一書每國辨異之以反命于王

蕙田案此後世遣使代巡之始

右晉

宋書文帝本紀元嘉四年二月東巡狩至于丹徒三月享會父老舊勳于行宮加賜衣裳幣帛蠲租原刑戰亡

之家及單孤並隨宜隱卹 二十六年二月東巡幸至
京城會舊京故老萬餘人享勞資發赦蠲徭役

孝武帝本紀大明七年春二月甲寅車駕巡南豫南兗
二州丁巳車駕校獵于歷陽之烏江己未車駕登烏江
縣六合山壬寅詔曰朕受天慶命十一年於茲矣憑七
廟之靈獲上帝之力禮橫四海威震八荒方巡三湘而
奠衡岳次九河而檢云岱今恢覽功成省風畿表觀民
六合蒐校長洲騰沙飛礫平岳盪海彘晉合序鏡鉦協
節獻鬯如禮饁獸傾郊敬舉王公之觴廣納士民之壽
八風循通卿雲叢聚盡天罄瑞率宇竭歡思散大極之
泉以福無方之外可大赦天下行幸所無出今歲租布
其逋租餘債勿復收賜民爵一級女子百戶牛酒刺守
邑宰及民夫從蒐者普加治資又詔曰朕弱年操製出

牧司雍承政宣風荐歷年紀國步中阻治戎江甸難夷
情義實繫于懷今或練蒐訓旅涉茲境間故邑耆舊在
目罕存年世未遠殲亡大半撫迹惟事傾慨兼著太宗
燕故晉陽洽恩世祖流仁濟畿暢澤永言往猷思廣前
資可蠲歷陽郡租輸三年遣使巡慰問民疾苦鰥寡孤
老六疾不能自存者厚賜粟帛高年加以羊酒凡一介
之善隨才銓貫前國名臣及府州佐吏量所沾錫人身
已往施及子孫壬申車駕還宮秋九月戊子詔曰昔周
王驥迹實窮四漠漢帝鸞軫夙徧五岳是皆所以上對
幽靈下理民土自天昌替馭臨宮創圖禮代天鬱世貿
興毀皇家造宋日月重光璇璣得序五星順命而戎車
歲動陳詩義闕朕聿含五光奄一天下思盡寶戒之規
以塞謀危之路當沿時省方觀察風俗外詳考舊典以

副側席之懷冬十月戊申車駕巡南豫州詔曰朕巡幸
所經先見百年者及孤寡老疾並賜粟帛獄繫刑罪並
親聽訟其士庶或怨鬱危滯受抑吏司或隱約潔立負
擯州里皆聽進朕前面自陳訴若忠信孝義力田殖穀
一介之能一藝之美悉加旌賞雖秋澤頻降而夏旱嬰
弊可卽開行倉並加賑賜癸丑行幸江寧縣訊獄囚丙
寅詔曰賞慶刑威奄國彝軌黜幽升明闢寓恒憲故採
言聆風式觀侈質貶爵加地于是乎在今類帝宜社親
巡江甸因覲獄守躬求民瘼思宏明試之典以申考績
之義行幸所經蒞民之職功宣于聽卽加甄賞若廢務
亂民隨營議罰主者詳察以聞己巳車駕校獵于姑熟
十一月丙子曲赦南豫州殊死以下巡幸所經詳減今
歲田租乙酉上于行所訊溧陽永世丹陽縣囚癸巳車

駕習水軍於梁山有白爵二集華蓋有司奏改大明七
年爲神爵元年詔不許乙未原放行獄徒繫東諸郡大
獄壬寅遣使開倉貸卹聽受雜物當租十二月丙午行
幸歷陽甲寅大赦天下南豫州別署救繫長徒一切原
散其兵期考襲謫戍悉停歷陽郡女子百戶牛酒高年
孤疾賜帛十匹蠲郡租十年癸亥車駕至自歷陽
魏書昭成帝本紀建國十二年西巡至河而還 十九
年二月帝西巡因而臨河使人招喻關頭從命 二十
二年春帝東巡至于桑乾川夏四月還雲中 二十五
年帝南巡至君子津冬十月行幸代
道武帝本紀登國二年冬十月癸卯幸濡源十一月遂
幸赤城十二月巡松漠還幸牛川 三年春二月帝東
巡夏四月幸東赤城六月渡弱落水班賞將士各有差

秋七月帝還赤城 七年秋八月行幸漠南仍築巡臺
八年春正月帝南巡二月幸殺羊原赴白樓夏六月
車駕北巡秋七月臨幸新壇庚寅宴羣臣仍講武九月
還幸河南宮 九年春三月帝北巡夏五月田于河東
秋七月還幸河南宮
天興元年春正月庚子車駕自中山行幸常山之真定
次趙郡之高邑遂幸于鄴民有老不能自存者詔郡縣
賑恤之帝至鄴巡登臺榭遍覽宮城將有定都之意乃
置行臺以龍驤將軍日南公和跋為尙書與左丞賈彝
率郎吏及兵五千人鎮鄴車駕自鄴還中山所過存問
百姓詔大軍所經州郡復貲租一年除山東民租賦之
半辛酉車駕發自中山至于望都堯山次于恒山之陽
二月車駕自中山幸繁峙宮 三年夏五月己巳車駕

東巡遂幸涿鹿西幸馬邑觀灑源秋七月壬子車駕還
宮 六年秋七月戊子車駕北巡築離宮于豺山縱土
校獵東北踰罽嶺出參合代谷九月行幸南平城規度
灑南面夏屋山背黃瓜堆將建新邑辛未車駕還宮
天賜三年春正月甲申車駕北巡幸豺山宮二月乙亥
幸代園山建五石亭三月庚子車駕還宮夏四月庚申
幸馬城甲戌車駕還宮秋八月甲辰行幸豺山宮遂至
青牛山丙辰西登武要北原觀九十九泉造石亭遂之
石漠九月甲戌朔幸漠南鹽池壬午至漠中觀天鹽池
度漠北之吐鹽池癸巳南還長川丙申臨觀長陂冬十
月庚申車駕還宮 四年夏五月北巡自參合陂東過
蟠羊山大雨暴水流輜重數百乘殺數百人遂東北踰
石漠至長川幸濡源西幸參合陂築北宮垣三旬而罷

五禮通考卷九十九 巡狩 三

乃還宮

明元帝本紀永興四年秋九月己巳朔東巡己卯大獮于石會山戊子臨去畿陂觀漁庚寅至于濡源西巡幸北部諸落賜以繒帛八月庚戌車駕還宮壬子幸西宮臨板殿大享羣臣將吏以田獵所獲賜之冬十有二月丁巳車駕北巡至長城而還五年夏四月乙卯車駕西巡五月乙亥行幸雲中舊宮之大室六月西幸五原校獵于骨羅山獲獸十萬秋七月己巳還幸薄山帝登觀太祖遊幸刻石頌德之處乃于其旁起石壇而薦享焉賜從者大酺于山下丙戌車駕自大室西南巡諸部落賜其渠帥繒帛有差遂南次定襄大落城東踰七嶺山田于善無川八月癸卯車駕還宮
神瑞二年夏四月己卯車駕北巡五月丁亥次于參合

東幸大寧丁未田于四岬山六月戊午幸去畿陂觀漁辛酉次于濡源築立犇臺射白熊于頽牛山獲之丁卯幸赤城親見長老問民疾苦復租一年南次石亭幸上谷問百年訪賢俊復田租之半壬申幸涿鹿登橋山觀溫泉至廣寧登歷山秋七月還宮復所過田租之半泰常元年夏六月丁巳車駕北巡秋七月甲申帝自白鹿陂西行大獮于牛川登金山臨殷繁水而南觀于十九泉戊戌車駕還宮二年夏五月車駕西巡至于雲中遂濟河田于大漠冬十有二月庚申田于西山癸亥車駕還宮四年夏四月辛巳南巡幸雁門賜所過無出今年租賦五月庚寅朔觀漁于灑水己亥車駕還宮復所過一年租賦秋八月辛未東巡遣使祭恒岳甲申車駕還宮所過復一年田租冬十有二月癸亥西巡

至雲中踰白道北獵野馬于辱孤山至于黃河從君子
津西渡大狩于薛林山 七年春正月甲辰朔自雲中
西行幸屋寶城賜從者大脯三日蕃渠帥繒帛各有差
二月丙戌車駕還宮賜從者布帛各有差秋七月乙巳
幸灑南宮遂如廣靈辛酉幸橋山因東幸幽州見耆年
問其所苦賜爵號分遣使者循行州郡觀風俗冬十月
甲戌車駕還宮復所過田租之半壬申車駕南巡出自
天門關踰恒嶺四方蕃附大人各率所部從者五萬餘
人 八年春正月丙辰行幸鄴存恤民俗三月乙巳帝
田于鄴南韓陵山幸汲郡至于枋頭乙卯濟自靈昌津
幸陳留東郡乙丑濟河而北西之河內造浮橋于冶坂
津夏四月丁卯幸成皋城觀虎牢遂至洛陽觀石經閏
月己未還幸河內北登太行幸高都辛酉還至晉陽班

賜從官王公以下逮于厮賤無不霑給五月丙寅還次
雁門皇太子率留臺王公迎于句注之北庚寅車駕至
自北巡六月丙辰北巡至于參合陂遊于蟠羊山秋七
月幸三會屋侯泉詔皇太子率百官以從八月幸馬邑
觀于灑源九月乙亥車駕還宮
太武帝本紀始光元年夏四月甲辰東巡幸大靈
神麈元年夏四月壬子西巡戊午田于河西六月甲寅
行幸長川秋七月車駕還宮八月東幸廣靈臨觀溫泉
九月車駕還宮冬十月甲辰北巡壬子田于牛川 二
年冬十有一月西巡狩田于河西至祚山而還
文成帝本紀太安三年冬十月將東巡詔太宰常英起
行宮于遼西黃山 四年春正月乙卯行幸廣靈溫泉
宮遂東巡平州庚午至于遼西黃山宮游宴數日親對

高年勞問疾苦二月丙子登碣石山觀滄海大亨羣臣
于山下班賞進爵各有差改碣石山爲樂游山築壇記
行于海濱戊寅南幸信都畋遊于廣川三月丁未觀馬
射于中山所過郡國賜復一年丙辰車駕還宮冬十月
甲戌北巡至陰山有故塚毀廢詔曰昔姬文葬枯骨天
下歸仁自今有穿毀墳壟者斬之辛卯車駕次于車輪
山累石記行

禮志和平元年正月帝東巡歷橋山幸遼西遂緣海西
南幸冀州北至中山

孝文帝本紀延興二年閏六月戊午行幸陰山秋七月
壬寅詔州郡縣各遣二人才堪專對者赴九月講武當
親問風俗九月辛巳車駕還宮三年冬十有一月癸
巳太上皇帝南巡至于懷州所過問民疾苦賜高年孝

梯力田布帛

太和五年春正月己卯車駕南巡丁亥至中山親見高
年問民疾苦二月辛卯朔大赦天下賜孝梯力田孤貧
不能自存者穀帛有差免宮人年老者還其所親丁酉
車駕幸信都存問如中山癸卯還中山己酉講武于唐
水之陽庚戌車駕還都三月辛酉朔車駕幸肆州癸亥
講武于雲水之陽所經考察守宰加以黜陟己巳車駕
還宮十五年秋七月乙酉車駕巡省京邑聽訟而還
十六年春二月壬辰巡省京邑聽理冤訟三月丁卯
巡省京邑十七年八月壬寅車駕至肆州民年七十
以上賜爵一級路見眇跛者停駕親問賜衣食終身戊
申幸并州親見高年問所疾苦九月庚午幸洛陽十
有八年春正月癸亥車駕南巡詔相克豫三州百年以

土假縣令九十以上賜爵二級七十以上賜爵一級孤
老鰥寡不能自存者賜粟五石帛二匹孝悌廉義文武
應求者皆以名聞乙亥幸洛陽西宮二月己丑行幸河
陰壬寅車駕北巡閏月癸亥次句注陘南皇太子朝于
蒲池壬申至平城宮秋七月壬辰車駕北巡辛丑幸朔
州八月癸卯皇太子朝于行宮甲辰行幸陰山觀雲川
丁未幸閱武臺臨觀講武癸丑幸懷朔鎮己未幸武川
鎮辛酉幸撫冥鎮甲子幸柔元鎮乙丑南還所過皆親
見高年問民疾苦貧窘孤老賜以粟帛丙寅詔六鎮及
禦夷城人年八十以上而無子孫兄弟終身給其廩粟
七十以上家貧者各賜粟十斛又詔諸北城人年滿七
十以上及廢疾之徒校其元犯以準新律事當從坐者
聽一身還鄉又令一子扶養終命之後乃遣歸邊自餘

之處如此之犯年八十以上皆聽還戊辰車駕次旋鴻
池辛未還平城宮冬十月辛亥車駕發平城宮壬戌次
于中山之唐湖乙丑分遣侍臣巡問民所疾苦己巳幸
信都十有一月辛未朔詔冀定二州民百年以上假以
縣令九十以上賜爵三級八十以上賜爵二級七十以
上賜爵一級鰥寡孤獨不能自存者賜以穀帛孝義廉
貞文武應求者具以名聞丁丑車駕幸鄴己丑車駕至
洛陽二十有一年春正月乙巳車駕北巡二月壬戌
次于太原親見高年問所不便乙丑詔并州士人年六
十以上假以郡守癸酉車駕至平城癸未行幸雲中乙
未車駕南巡己酉次離石詔汾州民百年以上假縣令
九十以上賜爵三級八十以上賜爵二級七十以上賜
爵一級丙辰車駕次平陽夏四月庚申幸龍門癸亥行

幸蒲坂辛未行幸長安乙亥親見高年問所疾苦丙子
遣侍臣分省縣邑賑賜穀帛戊寅幸未央殿阿房宮遂
幸昆明池己丑車駕東旋汎渭入河庚寅詔雍州士人
百年以上假華郡太守九十以上假荒郡八十以上假
華縣令七十以上假荒縣庶老以年各減一等七十以
上賜爵三級其營船之夫賜爵一級孤寡鰥貧窮痾廢
疾各賜帛二匹穀五斛其孝友德義文學才幹悉仰貢
舉六月庚申車駕至長安
孝莊帝本紀永安二年夏五月甲戌車駕北巡乙亥幸
河內戊寅詔上黨百年以下九十以上板三品郡八十
以上四品郡七十以上五品郡秋七月庚午車駕入居
華林園昇大夏門大赦天下
出帝本紀永熙二年冬十有二月丁巳車駕狩于嵩陽

己巳遂幸溫湯丁丑車駕還宮

北齊書文宣帝本紀天保三年夏六月乙卯帝如晉陽
九月辛卯帝自并州幸離石冬十月乙未至黃櫨嶺仍
起長城北至社干戌四百餘里立三十六戌十二月壬
子帝還宮戊午帝如晉陽 四年九月壬午帝北巡冀
定幽安 五年冬十二月庚申帝北巡至達速嶺覽山
川險要將起長城 九年夏六月乙丑帝自晉陽北巡
己巳至祁連池戊寅還晉陽
北周書明帝本紀二年九月丁未幸同州過故宅賦詩
曰玉燭調秋氣金輿歷舊宮還如過白水更似入新豐
霜潭漬晚菊寒井落疎桐舉杯延故老令聞歌大風冬
十二月辛酉還宮

武帝本紀保定三年秋七月戊辰行幸原州丁丑幸津

門問百年賜以錢帛又賜高年板職各有差九月甲子
自原州登隴山丙戌幸同州冬十二月辛卯至自同州
天和元年冬十一月丙戌行幸武功等新城十二月庚
申還宮

建德六年夏六月甲子帝東巡秋七月丙戌行幸洛州
己丑詔山東諸州舉有才者上縣六人中縣五人下縣
四人赴行在所共論治政得失冬十月戊申行幸鄴宮
十二月庚申行幸并州宮

宣政元年春正月壬午行幸鄴宮辛卯行幸懷州癸巳
幸洛州二月丁巳帝至自東巡

宣帝本紀大象元年春正月甲辰東巡狩戊午行幸洛
陽二月乙亥行幸鄴三月庚申至自東巡

右南北朝

隋書煬帝本紀大業元年三月詔曰聽採輿訟謀及庶
民故能審刑政之得失今將巡歷淮海觀省風俗八月
壬寅上御龍舟幸江都 二年三月庚午車駕發江都
四月庚戌自伊闕陳法駕備千乘萬騎入東京御端門
大赦 三年三月辛亥車駕還京師四月景申車駕北
巡狩六月戊子次榆林郡丁酉啟民可汗來朝八月壬
午車駕發榆林癸巳入樓煩關壬寅次太原九月己未
次濟源己巳至于東都 四年三月車駕幸五原因出
塞巡長城八月親祠恒岳河北道郡守畢集 五年三
月車駕西巡河右四月癸亥出臨津關渡黃河五月庚
辰入長窰谷壬午度星嶺六月癸卯經大斗拔谷景午
次張掖戊午大赦天下行經之所給復二年九月癸未
車駕入長安十一月景子車駕幸東都 六年三月癸

亥幸江都宮 七年二月上自江都御龍舟入通濟渠
遂幸于涿郡 八年三月車駕度遼九月上至東都
九年四月車駕度遼九月車駕次上谷 十年三月行
幸涿郡四月車駕次北平七月車駕次懷遠鎮冬十月
丁卯上至東都已丑還京師十二月壬申上如東都
十一年五月幸太原避暑汾陽宮八月巡北塞十月上
至于東都 十二年七月幸江都宮

右隋

唐書禮樂志天子將巡狩告于其方之州曰皇帝以某
月于某巡狩各修乃守考乃職事敢不敬戒國有常刑
將發告于園丘前一日皇帝齋如郊祀告昊天上帝又
告于太廟社稷具大駕鹵簿所過州縣刺史令候于境
通事舍人承制問高年祭古帝王名臣烈士既至刺史

令皆先奉見將作築告至園壇于嶽下四出陛設昊天
上帝配帝位天子至執事皆齋一日明日望于嶽鎮海
濱山川林澤邱陵墳衍原隰所司為壇設祭官次于東
壇門外道南北向設饌幔內壇東門外道北南向設宮
懸登歌為瘞培祭官執事皆齋一日嶽鎮海濱山川林
澤邱陵墳衍原隰之尊在壇上南陛之東北向設玉篚
及洗設神座壇上北方獻官奠玉幣及爵于嶽神祝史
助奠鎮海以下明日乃肆覲將作于行宮南為壇三分
壇間之二在南為壇于北廣九丈六尺高九尺四出陛
設宮懸壇南御座壇上之北解劔席南陛之西文武官
次門外東西刺史令次文官南蕃客次武官南列輦路
壇南文官九品位壇東南武官西南相向刺史令位壇
南三分庭一蕃客位于西又設門外位建牙旗于壇外

黃麾大仗屯門鉞戟陳壝中吏部主客戶部贊羣官客使就門外位刺史令贊其土之實錦綺縉布葛越皆五兩爲束錦以黃帊常貢之物皆筐其屬執列令後文武九品先入就位皇帝乘輿入北壝門由北陛升壇卽坐南向刺史蕃客皆入壝門至位再拜奠贊興執贊侍中降于刺史東北皆拜宣已又拜蕃客以舍人稱制如之戶部導貢物入刺史前龜首之金次之丹漆絲纊四海九州之美物重行陳執者退就東西文武前側立通事舍人導刺史一人解劍脫舄執贊升前北向跪奏官封臣姓名等敢獻壤奠遂奠贊舍人跪舉以東授所司刺史劍舄復位初刺史升奠贊在庭者以次奠于位前皆再拜戶部尚書壇闕北向跪請以貢物付所司侍中承制曰可所司受贊出東門中書侍郎以州鎮表方一案

俟于西門外給事中以瑞案俟于東門外乃就侍臣位初刺史將入乃各引案分進東西陛下刺史將升中書令黃門侍郎降立旣升乃取表升尚書旣請受贊中書令乃前跪讀黃門侍郎給事中進跪奏瑞侍郎給事中導案退文武刺史國客皆再拜北向位者出就門外位皇帝降北陛以入東西位者出設會如正至刺史蕃客入門皆奏樂如上公會之明日考制度太常卿採詩陳之以觀風俗命市納賈以觀民之好惡典禮者考時定日同律禮樂制度衣服正之山川神祇有不舉爲不恭宗廟有不慎爲不孝皆黜爵革制度衣服者爲叛有討有功德于百姓者爵賞之

舊唐書高祖本紀武德三年春正月辛巳幸蒲州
唐書太宗本紀貞觀四年秋九月己卯如隴州壬午禁

芻牧于古明君賢臣烈士之墓者十月壬辰赦岐隴二
州免今歲租賦降咸陽始平武功死罪以下乙卯免武
功今歲租賦十一月甲子至自隴州 十一年春二月
甲子如洛陽宮乙丑給民百歲以上侍五人三月癸卯
降洛州囚見徒免一歲租調九月丁亥河溢壞陝州河
北縣毀河陽中潭幸白司馬坂觀之賜頻河遭水家粟
帛十一月辛卯如懷州丙午如洛陽宮 十二年二月
癸亥如河北縣觀底柱乙丑如陝州丁卯觀鹽池庚午
如蒲州甲戌如長春宮免朝邑今歲租賦降囚罪丙戌
至自長春宮
冊府元龜貞觀十五年正月如洛陽次溫泉衛士崔卿
刁文懿憚于行役冀鑿輿驚擾而停遂夜射行宮矢及
寢院者五皆以大逆論己丑詔從行士卒家貧親老並

放還二月癸丑宴從官及山東宗姓洛陽年高子貞觀
殿三月戊辰如襄城宮庚午罷襄城宮分賜百姓十月
壬辰幸嵩陽辛丑還宮十一月壬申還京十二月戊子
至自洛陽 十八年二月己酉幸零口村落偏側問其
受田丁三十畝遂夜分而寢憂其不給詔府州錄尤少
田者並給復移之于寬鄉乙卯還宮十一月壬申至洛
陽宮壬午宴父老百九十八人于儀鑾殿班賜有差
唐書太宗本紀貞觀二十年八月如靈州庚辰次涇州
賜高年鰥寡粟帛丙戌踰隴山關次瓦亭觀牧馬九月
辛卯遣使巡察嶺南十月丙戌至自靈州
高宗本紀永徽五年三月戊午如萬年宮乙丑次鳳泉
湯辛未赦岐州及所過徒罪以下八月己未詔免麟游
岐陽今歲課役岐州及供頓縣半歲九月丁酉至自萬

巡符
三

年宮

顯慶二年閏正月壬寅如洛陽宮二月癸亥降洛州囚
罪徒以下原之免民一歲租調賜百歲以上氈衾粟帛
十一月戊戌如許州甲辰遣使慮所過州縣囚王子赦
鄭州免一歲租賦賜八十以上粟帛其嘗事高祖任佐
史者以名聞十二月乙卯如洛陽宮丁卯以洛陽宮為
東都 四年閏十月戊寅如東都辛巳詔所過供頓免
今歲租賦之半賜民八十以上氈衾粟帛 五年正月
甲子如并州己巳次長平賜父老布帛二月丙戌赦并
州及所過州縣義旗初嘗任五品以上葬并者祭之加
佐命功臣食別封者子孫二階大將軍府僚佐存者一
階民年八十以上版授刺史縣令賜醕三日三月丙午
皇后宴親族鄰里于朝堂會命婦于內殿賜從官五品

以上并州長史司馬勳一轉婦人八十以上版授郡君
賜氈衾粟帛四月癸巳如東都

舊唐書高宗本紀龍朔元年三月壬戌幸合璧宮七月
癸卯車駕還東都八月丙戌令諸州舉孝行尤著及累
葉義居可以勵風俗者九月甲辰以河南縣大女張年
百三歲親幸其第又幸李勣之第天宮寺是高祖潛龍
時舊宅上周歷殿宇感愴久之度僧二十人壬子敕中
書門下五品已上諸司長官尚書省侍郎并諸親三等
以上並詣沛王宅設宴禮奏九部樂禮畢賜帛雜綵等
各有差十月丁卯狩于陸渾癸酉還宮
冊府元龜咸亨元年九月丁丑京師久旱詔來年正月
幸東都在路供頓所須並令司稼自供不得令州縣差
科所經道路修理開拓水可涉渡不煩造橋築宮又擬

置御營之驛並不敢擅加修補在路不得妄有進獻

唐書高宗本紀咸亨二年正月乙巳如東都二月辛未

遣使存問諸州十一月庚戌如許州遣使存問所過老

疾鰥寡慮囚十二月癸酉獵于昆陽丙戌如東都

儀鳳元年二月丁亥如汝州溫湯遣使慮免汝州輕繫

三月甲辰如東都免汝州今歲半租賜民八十以上帛

四月戊申至自東都

冊府元龜儀鳳三年五月壬戌發京師幸九成宮丙戌

至九成宮是日山中霖雨大寒從行兵士有凍死者各

賜絹三匹給棺槨官為埋殯又九月丁巳車駕發九成

宮辛酉至京師十月詔曰咸京天府地隘人繁百役所

歸五方胥萃雖獲登秋之積猶虧存歲之資眷言于此

思蠲徭賦夫以交風輿壤測景神州職貢所均水陸輻

輳今茲豐熟特倍常時事貴從宜實惟權道即以來年

正月幸東都關內百姓宜免一年庸調及租并地子稅

草其當道諸縣特免二年劍南隴右諸軍每供進物一

二年且停

永濟元年四月丙寅如東都

舊唐書高宗本紀永濟元年四月丙寅幸東都上以穀

貴減廩從兵士庶從者多殍踣于路戊寅次澠池之紫

桂宮乙酉至東都

唐書高宗本紀弘道元年正月甲午幸奉天宮四月己

未如東都

冊府元龜先天元年十一月睿宗命帝巡邊詔曰先王

省方所以觀風設教聖人順動所以刑清毗服故協時

同律虞典之嘗道喬嶽翁河周詩之盛德自王風不競

茲禮遂亡兩漢本朝有時于邁三國以降日不暇給我
皇家開元首出十代重光寶宇大富車書無外文祖神
宗之德洽于人心考祥展義之規昭于國典皇帝天錫
英武神與聰明自陟元后實總朕師時政益明彝倫攸
敘而邊毗遐阻藩服悠曠式慰來蘇之懷實允卜征之
意加以頃年邊將授任或乖師旅以虧軍威不振今盛
德在水元冥御辰天道成于積陰王制崇于大閱皇帝
宜順時巡狩親幸邊陲掌圖修考事之儀典樂具陳詩
之禮西泊河塞東踰燕朔望秩名山肆覲羣后休農問
老誓師訓卒其有牧州典郡功施于人杖節擁旄隱若
敵國者當崇進律之賞加以分麾之命若郡政不舉軍
令莫修聚斂苛細侵削戰士者宜明茲憲典肅以天誅
然後七萃騰裝三軍案節合符釜山之典覽軒帝之餘

風勒騎單于之臺踐漢皇之故事使陰山罷祿大漠無
塵其供帳所資儲擬之費皆令有司支備不得煩人甲
午帝以北巡之故慎選良將乃以幽州防禦使幽州都
督宋璟為左軍大總管和戎等軍大使并州長史薛訥
為中軍大總管兵部尚書郭元振為右軍大總管既而
竟不行二年八月癸卯制曰咸維京師建都惟舊乃
眷時邁卜御斯在自中宗入關于今八載省方之典久
而莫修遂使水漕陸輓方春不息勞人奪農卒歲何望
關東嗟怨朕實閔焉思欲甯人而休轉運館穀而就敖
庾加以暑雨作害災拂秦川歲星有福祥歸豫野朕情
深救弊身豈懷安博考靈心審聽輿語上奉天以為孝
下利人以為忠順時而動從眾之願宜以今年十一月
行幸東都凡厥有司各恭乃事至于從行兵馬供頓貯

積務在撙節勿使煩勞考使選人咸令都集東都宮殿
須理量加補葺不得煩人朕本爲人而行非擬勞人自
奉所過州縣無費黎元亦不得輒有差科旁求進獻宣
布遐邇知朕意焉十月己亥幸新豐之溫湯乙巳至自
溫湯

開元二年九月戊申幸新豐之溫湯十一月甲申敕曰
惟此新豐是出古之順豫義兼巡省頃者觀風數臨茲
地以寃滯詢于故老閭里歡康田疇墾闢況冬降積雪
春期有年且諺王遊果符時邁雖千乘萬騎咸給于主
司而累月再來頗勤于除埽且下復蠲之令慰其望幸
之心新豐縣百姓免一年雜差科縣官及溫泉監官經
兩度祇承者與一中上考 三年十月癸亥幸郿縣之
鳳泉湯甲戌制曰詩人賦田以備蒐狩之義王者順時

式展畋遊之禮頃者築場神甸清道子來經上林之苑
圖指扶風之藪澤雖獵將提鼓虞人植旗仍憫互寒之
節不行肅殺之命豈非虞舜之典咸秩山川所冀周文
之風及于鳥獸絲是罷還士卒非重盤遊養彼吏人致
有煩擾所謂行者幸也後來其蘇宜申恩惠用符古昔
所經州縣供承頓官百姓并告營幕橋道等事宜令所
司勘會奏聞其緣御路及頓場麥苗有損者亦令具實
奏聞十一月己卯至鳳泉湯是月詔曰陳詩展義問俗
觀風乃王者之所務也頃屬農事皆隙歲功有成近歷
鄠鎬左連岐雍見江山秀麗溝塍綺錯長楊鄠杜之間
竹林園果之富相望于道家給人足謂之時邁頗慰予
懷思所以問耆老恤淹滯舉逸人旌賢士庶協巡遊之
典以符行在之恩駕所過之縣見禁囚徒以下咸宜放

免流以上罪犯具狀奏聽進止古者親問高年養存孤
老年九十以上并篤疾各賜物四段綿布各一匹 五
年正月辛亥幸東都庚申敕曰行幸所經州宜令紫微
令黃門平章事蘇頲訪察刺史上佐政術定作三等奏
聞二月甲戌至東都 六年七月辛酉詔曰觀俗省方
所以愛人治國崇尊廟貌所以事神享親欽若昔典此
惟大義朕祇膺鴻業積稔咸泰去歲欲幸洛京已發成
命旋屬重營太廟因將中止未卽展輪効駕信弗可違
終肆觀于東方當載馳于西土流暑不駐通喪永畢象
居始成如在增慕朕之前志日夜匪遑故可以詩陳肅
雍禮極禋祀況神明之隕時惟雍州稼穡有年莫若關
輔王假用吉后來其蘇實獲我心俾從人欲可以今年
十月取北路幸長安所司準式務在節省無得勞費甲

寅復詔曰兩京來去乃是尋常緣頓所須皆用官物至
于百姓縱暫祇承處置有條不令辛苦其中侵擾莫非
橫干或漁獵畜養以將進獻徒使役以徇聲名實由綱
紀未樹教令不行去年從京向都營亦處分蒲州刺史
程行誡同州刺史李朝隱陝州姜師度至其州界咸有
進奉惜其能善政故乃屈法收情憶至于今豈能無怪
冬中西幸不可踵前其有輒進送及餉遺從官并別有
煩擾者必科以法御史明加糾察隨時奏聞九月辛卯
以將作大匠章濬爲東都留守十月甲寅還京十一月
辛未至自東都 九年九月甲戌詔曰王者觀俗以賦
政考祥以省方必將協于人和而奉若天命朕祇承鴻
業用康黎庶思振德以惠物豈勞人以尊己頃年關輔
之地轉輸實煩重以河塞之役兵戎屢動千金有費九

載未儲懷此勞軫以增吁戾且夫苟利于物可隨方面
變通將適于人故因時以巡幸卜洛萬方之隩維嵩五
岳之中風雨之所交舟車之所會流通江汴之漕控引
河淇之運利俗阜財于是乎在今欲省其費務以實關
中卽彼敖庾少留河邑乘歲陽之吉展遊順之儀豈惟
龜筮不違故亦詢謀是協修五禮問百年車輿動而不
勞玉帛會而胥悅所謂先天以宏道因人以爲利也宜
以明年正月十五日幸東都

唐書元宗本紀開元十年正月丁巳如東都二月丁丑
次望春頓賜從官帛

冊府元龜開元十年正月丁巳幸東都二月戊寅至東
都八月壬子制曰朕頃自鎬京省方于維本以息轉輸
之費卽河漕之殷今屬宗廟改修禮崇昭事永言配享

必在躬親又眷彼晉陽是稱重鎮將陳詩以問俗式安
邊而訓武雖來往祇供頗有煩役而國之大事不可云
勞宜以明年正月三日發雒幸并州取便路還京應須
支計所留準式緣頓祇承一事以上竝用當處官物不
許科斂百姓其遞運及從兵馬官寮等務從減省所在
公私竝不得輒有進獻違者所由州縣官及進獻人各
量事貶罰布告遐邇咸使聞知

唐書元宗本紀開元十一年正月丁卯降東都囚罪杖
以下原之己巳如并州降囚罪徒以下原之賜侍老物
庚辰次潞州赦囚給復五年以故第爲飛龍宮辛卯次
并州改并州爲北都癸巳赦太原府給復一年下戶三
年元從家五年版授侍老八十以上上縣令婦人縣君
九十以上上州長史婦人郡君百歲以上上州刺史婦

人郡夫人二月壬子如汾陰賜文武官階勳爵帛三月
辛未至自汾陰免所過今歲稅赦京城

舊唐書元宗本紀開元十二年十一月庚申幸東都至
華陰上製嶽廟文勒之于石立于祠南之道周戊寅至
自東都

唐書元宗本紀開元十三年十月辛酉如兗州庚午次
濮州賜河南北五百里內父老帛十一月庚寅封于泰
山辛卯禪于社首壬辰大赦賜文武官階勳爵致仕官
一季祿公主嗣王郡縣主一子官諸蕃酋長來會者一
官免所過一歲兗州二歲租賜天下哺七日丁酉賜徐
曹亳許仙豫六州父老帛十二月己巳如東都

冊府元龜開元十五年六月乙巳西京父老詣闕上表
請幸帝手詔許之甲寅制曰朕粵自鎬鄴省方溼雒屬

九服甯宴四時順成殊徵龐殷景福紛委遂荷靈睭登
于介邱先天成功允答休祐蓋敬天知命不敢以甯也
我來于東歲亦數稔而西土耆老僭予多怨況關輔之
地頃則有年宜叶卜征之祥式展時巡之義可以今年
閏九月十日取北路幸長安所司準式緣頓支供一事
以上竝用當處官物不須科斂百姓其遞運及行從官
寮等務從減省所在公私不得輒有進獻宣布遐邇知
朕意焉八月己巳制曰朕君臨區宇子育黎元每懷勤
恤不欲勞煩而鎬京之地陵寢所在自展義河雒已歷
歲年所以式尊卜征有事時邁抑惟嘗典甯敢憚勞將
欲西巡元取北路今同州有暴水浸于邑居載懷憂惕
無忘鑒寐且從南路幸長安所司準式閏九月庚申發
東都幸京師十月己卯至京師 十九年六月丁卯制

日三秦九雜咸曰帝京五載一巡時維邦典上腴多饒
衍之美仍勞于轉輸中壤均舟車之湊頗聞于殷積朕
所以相時度宜期于利物者也况河汴頻稔江淮屢登
二周馳望幸之誠三川勤瘵予之請然猶未便順動且
念人勞期以來年方議時邁而頃京輔近甸膏澤未均
陝雜之交稼穡亦盛固不可俟于今日庶用協乎光天
豈肆心于宴安期順人而從幸兩京供帳宿有儲擬十
月滌場是因暇隙信可備法駕整句陳清蹕嶠潼觀風
河雜宜以今年十月四日幸東都所司準式十月丙申
幸東都勅供頓州縣百姓所緣料及充木匠雜祇供人
等宜放今年地租自餘戶等免今年地稅半應定供頓
縣官各與一中上考庚辰至東都

唐開元禮皇帝巡狩告園丘告社廟及歸格禮並附

齋戒

將告前一日皇帝齋於太極殿如郊祀之儀凡應告之
官清齋于告所告社齋于太社告廟齋于廟所近侍之官應從升者及羣官
客使等各於本司及公館各清齋一宿諸衛令其屬晡
後一刻各以其方器服守衛墻門社則社門廟則廟門與太樂工人
俱清齋一宿

陳設

前告三日尚舍直長施大次于外墻東門之內道北南
向社則宮西門廟則廟東門尚舍奉御鋪御座衛尉社則守宮廟同社設文武侍臣
次於大次之後文官在左武官在右俱南向設告官及
從駕羣官次各於常所設陳饌幔於內墻東門之外道
南北向社無饌幔廟同社前二日太樂令設宮懸之樂於墻南社則社
于壇北設登歌及舉麾位於壇上廟于庭並如常儀社自此則右校清埽內外為瘞

五禮通考卷一百九 巡狩 三

壇二千樂前一日右校埽除壇之內外郊社令積柴於燎

壇方一丈二尺開上南出戶高四尺社無燎壇奉禮設御

位於壇之東南南向將告奉禮即一人守之在版位西南五步所西向

設望燎位當柴壇之北南向設告官及從駕羣官版

位於內外如常儀郊社令廟太廟令帥府史一人社及齋郎以

尊坩鬯洗篚篚及玉幣之篚入設於位並如常儀廟酒尊

纂者各位於尊鬯篚幕之後告日未明十五刻太史令

郊社令設昊天上帝神座於壇上北方南向席以藁秸

設神位於座首廟太廟令整拂神幄又帥府史齋告日未明十刻

太官令帥宰人以鸞刀烹牲於廚社告日未明十五刻太官令帥

郎以豆取牲血如常未明四刻太史命郊社令

各服其服升設神座席位如常廟每室各一犢

變駕出宮社廟

皇帝服袞冕之服乘玉輅備大駕及嚴鼓時奏請發內
外器服皆如常儀

親告告社則薦玉帛及進熟

其日未明三刻諸告官各服其服郊社令良醞令各帥

其屬入實尊鬯玉幣太廟實以汎齊凡尊皆二其元酒各實于上尊禮

以象尊實亦如之明水實于上尊玉兩珪有邸太祝各以幣置于篚幣隨牲色各

長丈八尺晨裸雞彝尊彝犧尊尊之上實以明水鳥彝黃彝實以鬱鬯犧樽著

尊實以太官令帥進饌者實籩豆簋簠入設于內壝東門

外饌幔內社於未明二刻奉禮帥贊者先入就位贊引引

御史太祝以下入行埽除如常儀訖各引就位廟又未明一

刻贊引引太將至謁者贊引各引告官以下及從告羣官客使先置

者俱就門外位駕至大次門外迴輅南向領千牛將軍

降立於輅右侍中進當變駕前跪奏稱侍中臣某言請

降輅俛伏興還侍位皇帝降輅之大次協律郎太樂令

帥工人各入就位凡升壇坐者皆脫屣于下降納如常社降輅之大次郊社令以祝板進署如常儀謁者贊引各引從駕羣官俱

就門外位奉禮帥贊者先入就位贊引御史及諸太祝與執尊壘罷器者入就位大樂令帥工人次入就位通事舍人各引告官及從告羣官客使次入就位升壇者脫屣如常儀太廟令以祝板進署通事舍人引從駕羣官就門外位

皇帝停大次半刻頃謁者贊引

引從駕羣官入就位太常博士引太常卿立於大次門

外當門北向侍中板奏外辦皇帝服大裘而冕出次華

蓋侍衛如常儀侍中負寶陪從如常社停大次太常博士引太常卿立於大次門外當門北向侍中板奏外辦皇帝出次華蓋侍衛

如常告博士引太常卿太常卿引皇帝凡太常卿前導皆博士先引至內壇

門外社宮北門外廟廟門外殿中監進鎮圭華蓋仗衛停於門外近侍

者從入如常謁者引禮部尚書太常少卿陪從如常社無

引下至如常廟同社皇帝至板位西向立每立定太常卿博士退立於左告社儀皇帝南面立通事舍

人各引從告官及諸王介公鄙公諸方客使以次入就位立定社無通事舍人各引下至此廟同社太常卿前奏稱請再拜退復位皇帝

再拜奉禮曰眾官再拜贊者承傳凡奉禮下辭贊者皆承傳眾官在位者

皆再拜其先拜者不拜太常卿前奏有司謹具請行事退復位協

律郎跪俛伏興舉麾凡取物者皆跪伏而取以興奠物則奠訖俛伏後興鼓祝奏元和之

樂乃以圓鍾之均作文舞之舞六成偃麾戛鼓樂止凡樂皆協

律郎舉麾工鼓祝而後作偃麾戛鼓而後止社奏順和之樂以圓鍾之均樂

入成廟奏永和之樂以黃鍾之均樂九成黃鍾三奏大呂太簇應鍾各再奏太常

卿前奏稱請再拜退復位皇帝再拜奉禮曰眾官再拜

眾官皆再拜廟則晨裸太常卿引皇帝詣壘洗太和之樂作樂止侍中跪取

取巾於篚進皇帝視手訖黃門侍中跪取盤盥承水皇帝指鎮圭盥手黃門侍中跪

進皇帝受瓚侍中酌壘水又侍中奉盤皇帝洗瓚黃門侍中又取瓚於篚興

贊訖侍中奠盤匝黃門侍中奠於篚皆如常太常卿引皇帝樂作升階樂止

侍中以下量人從升太常卿引皇帝詣獻祖尊壘所執尊者舉幕侍中贊酌鬱酒

訖登歌作肅和之樂以圓鍾之均自後登歌皆歌圓鍾太常卿初引皇帝入詣獻

祖神座前北向跪以壘裸地奠之俛伏與太常卿引皇帝出戶北向再拜訖太常

卿引皇帝詣獻祖尊壘所執尊者舉幕侍中取瓚于壘進皇帝受瓚侍中贊酌鬱

酒訖太常卿引皇帝入詣獻祖神座前北向跪以壘裸地奠之俛伏與太常卿引

皇帝出戶北向再拜訖太常卿引皇帝次裸太祖次裸世祖高祖太宗高宗中宗

睿宗並如上儀訖登歌止太常卿引皇帝樂作皇帝降自階階至版位西向立樂

止諸太祝俱取玉幣於篚各立於尊所廟無太祝取玉幣至尊所太常卿

引皇帝太和之樂作皇帝每行皆作太和之樂皇帝詣壇升自南陛社升北陛以下

北階近侍者從升如常儀皇帝升壇北向立社南樂止太

祝加玉於幣以授侍中侍中奉玉幣東向進社西皇帝受

玉帛登歌作肅和之樂太常卿引皇帝進北向社南跪奠

於天帝神座社太俛伏興太常卿引皇帝少退北向社南再

拜訖登歌止樂作社太俛伏興太常卿引皇帝少退北向社南再

還版位西向立樂作初羣官拜訖謁者引司徒太官令

出帥進饌者奉饌陳於內壝東門之外司徒奉天帝之

俎皇帝既至位樂止太官令引饌入俎初入門雍和之

樂作饌至階樂止饌升於南陛太祝迎引於壇上各設

於神座前邊豆蓋纂設訖謁者引司徒以下降自東陛復

位諸太祝各還尊所社儀皇帝奠玉帛訖降還版位下有進熟篇自皇帝

外司徒奉太社之俎初皇帝既至位樂止太官令引太社太稷之饌入自正門后

土后稷之饌入自左門俎初入門雍和之樂作饌至陛樂止太社太稷之饌升自

北陛后土后稷之饌升自西陛諸祝迎引於壇上各設於神座前廟儀於此有饌

食篇皇帝既升俎太官令出帥進饌者奉饌陳於東門外謁者引司徒出詣饌所

司徒奉獻祖之俎初皇帝既至位樂止太官令引饌入自正門俎初入門雍和之

樂作以無射之均自後接神皆奏無射饌至太陛諸太祝迎引於壇上樂止各設

于神座前設訖謁者引司徒以下降復位諸祝各還尊所太常卿引皇帝詣壘洗

樂作皇帝至壘洗樂止盥手洗爵侍中贊酌醴齊壽和之樂作每酌獻皆作壽

帝樂作升階階樂止詣獻祖尊彝所侍中贊酌醴齊壽和之樂作每酌獻皆作壽

和之樂太常卿引皇帝入詣獻祖神座前北面跪奠爵俛伏興出后北向立樂止

太祝持版進於室戶外之右東面跪讀祝文祝文臨時制讀訖興皇帝再拜初讀

祝文訖樂作太祝入奠祝版於神座與出還尊所太常卿引皇帝詣壘洗樂止

酌獻如初儀唯不盥洗訖太常卿引皇帝詣東序西向立樂止

至壘洗樂止侍中跪取匱興沃水又侍中跪取盤興承

水皇帝盥手黃門侍郎跪取巾於匱興進皇帝受爵侍中酌

受巾跪奠於匱遂取匏爵於匱興進皇帝受爵侍中酌

爵又侍中奉盤皇帝洗爵黃門侍郎又授巾皆如初皇

帝拭爵訖侍中奠盤匱黃門侍郎受巾奠於匱皆如常

太常卿引皇帝樂作皇帝詣壇升自南陛社則升太樂止

近侍者從升如常謁者引司徒升自東陛社則西陛立於尊所

齋郎奉俎從升立於司徒之後太常卿引皇帝詣天帝

社云太社酒尊所執尊者舉冪侍中贊酌汎齊社禮訖壽和

下故此之樂作皇帝每酌獻及飲福太常卿引皇帝進天帝神座前北

向跪社南奠爵俛伏興太常卿引皇帝少退北面立樂止

太祝持版進於神座之右東面社西跪讀祝文祝文臨時撰社廟同訖

興皇帝再拜初讀祝文訖樂作太祝進奠版於神座還

尊所社皇帝拜訖樂止太常卿引皇帝詣后土氏酒尊所酌獻西向奠爵太

常卿引皇帝進天帝神座前北面立樂作太祝以爵酌

福酒合置一爵一太祝持爵以授侍中侍中受爵西向

進皇帝再拜受爵跪祭酒啐酒奠爵俛伏興廟皇帝獻將畢

自東階立於前楹間北面諸祝各酌諸太祝各帥齋郎進俎太祝減

神前胙肉加於俎興以胙肉共置一俎上授司徒司徒

奉俎西向進皇帝受以授左右廟祝帥齋郎獻胙肉又以籩取黍稷

進授皇帝以授皇帝再拜跪取爵遂飲卒爵侍中進受爵以

授太祝太祝受爵復於坵皇帝俛伏興再拜樂止太常

卿引皇帝樂作皇帝降自南陛社降北陛太常卿引詣太稷行還

版位西向立樂止謁者引司徒降復位太祝各進徹豆

還尊所徹者邊豆各一少移於故處廟司徒奉禮曰賜胙贊者唱

眾官再拜在位者皆再拜樂作太常卿前奏稱再拜退

復位皇帝再拜眾官皆再拜樂一成止太常卿前奏請

就望燎位社則望燎太常卿引皇帝樂作皇帝至望燎位

社則就南向立樂止於羣官將拜諸太祝各以篚進神座

前取玉帛祝版齋郎以俎載牲體黍稷飯爵酒興各自

其陛降壇南行當柴壇南東行自南陛登柴壇以玉帛

饌物置於柴上訖奉禮曰可燎東西面各四人以炬燎

火半柴社則降壇南當壑培西行諸祝以玉帛饌物太常卿前奏禮畢

廟無望太常卿引皇帝出內壝門社出宮門殿中監前受鎮

珪華蓋侍衛如常儀皇帝入次樂止謁者贊引引各從

告官及從駕羣臣諸方客使以次出贊引引御史以下

俱復執事位立定奉禮曰再拜御史以下皆再拜贊引

引出工人以下以次出社廟祝版燎於齋所

鑾駕還宮

皇帝既還大次侍中版奏請解嚴將士不得皇帝改服通

天冠絳紗袍乘金輅鼓吹振作奏請還宮如常儀

皇帝巡狩

鑾駕出宮

將巡狩所司承制先頒告於東方諸州曰皇帝二月東

巡狩各修平乃守考乃職事無敢不敬戒國有大刑駕

將發告園丘宗廟社稷皆如別儀皇帝出宮大備鹵簿

皆如常儀載於國門祭所過山川如親征之禮所經州

縣刺史縣令先待於境通事舍人承制問百年古先帝

王名臣烈士皆州縣致祭

燔柴告至

將告將作先於秦山下修圓壇四出陛若先有封禪祝天前

告三日尚舍直長施大次於外壝東門之內又設文武侍設

宮懸樂燎壇之制丘之儀前一日皇帝清齋於行宮應告

之官皆於告所清齋一日近侍之官應從升者及從告

羣官諸方客使皆於其所俱清齋一宿諸衛令其屬晡

後一刻各以其方器服守衛壝門與太樂工人俱清齋

一宿奉禮設御位於壇之東南西向設告官司徒執事

者御史奉禮贊者協律郎太樂令望燎位東方諸州刺

史縣令介公鄴公文武九品以上官諸方客使蕃客等
位並如上辛園丘儀其儀聖侯等亦如之設告官以下門外位於東
西壇門之外道南皆如設次之式郊社令帥府史一人
及齋郎以尊坩鬯洗篚罍入設於位並如常儀執尊罍
篚罍者各位於尊罍篚罍之後告日未明十五刻太官
令帥宰人烹牲於廚牲一未明四刻太史令郊社令各
服其服升設昊天上帝神座於壇上北方南向席以藁
藉設高祖神堯皇帝神座於東方西向席以莞設神位
各於座首未明三刻諸告官以下各服其服郊社令良
醞令各帥其屬入實尊罍及玉天帝太尊二配帝著尊二俱實以
汎齊其明水各實于上尊玉以香
璧幣一太祝以玉帛置於篚太官令帥進饌者實諸籩豆
簠簋等皆設於饌幔內未明二刻奉禮帥贊者先入就
位贊引引御史太祝以下入行埽除如常儀訖各就位

皇帝服袞冕乘輅發行宮奏請進發內外器服如常儀
駕將至謁者贊引各引告官通事舍人引從告羣官東
方刺史縣令諸方客使俱就門外位駕至大門外次迴
輅南向具降輅之大次謁者引告官及從告羣
官入就位皇帝奠玉帛等儀並如園丘初皇帝既升奠玉幣
太官令帥進饌者其奉饌奏樂之儀並如園丘天帝之
饌升自南陛配帝之饌升自東陛諸太祝迎引
於壇上各設於神座前設訖謁者引司徒以下降自東
陛復位諸太祝各還尊所太常卿引皇帝詣罍洗樂作
其由洗酌獻奏樂讀祝之儀
並如園丘其祝文臨時撰訖興皇帝再拜初讀祝文訖樂作太
祝進奠版於神座還尊所其酌獻配帝奏樂讀
祝之儀並如園丘皇帝拜訖樂止
太常卿引皇帝進天帝神座前北向立樂作太祝各以
爵酌福酒其飲福受胙奏樂皇帝
還版位之儀並如園丘謁者引司徒降復位太祝各
進徹豆還尊所奉禮曰賜胙其受胙皇帝望燎及太祝燎牲體
玉幣皇帝還大次禮官二人次出等儀
並如
園丘

鑾駕還行宮

皇帝既還大次侍中版奏請解嚴將士不得皇帝改服通天冠絳紗袍乘輅奏請還宮如常儀

望秩于山川

柴之明日望秩祀于嶽鎮海瀆山林川澤邱陵墳衍原隰將祭所司先為壇於祭所其神皆以尊卑為敘重行南向前三日守宮設祭官以下次於東壝之外道南北向以西為上設陳饌幔於內壝東門之外道北南向前二日太樂令設宮縣之樂於壇南設登歌於壇上皆如常儀右校埽除壇內外又為瘞瘞於壇北之壬地外壝之內方深取足容物前一日諸祭官各清齋於祭所諸衛令其屬晡後一刻各以其方器服守衛壝門與太樂工人俱清齋一宿奉禮設祭官位於內壝東門之內道

北執事位於道南俱西向北上設御史位於壇下一位於東南西向一位於西南東向令史各陪其後設奉禮位於樂懸東北贊者二人在南差退俱西向協律郎位於壇上在西陛之西東向設太樂令位於北懸之閒設望瘞位於瘞瘞之東西向設祭官以下門外位於外壝東門之外道南每等異位北向西上設酒尊之位嶽鎮海瀆各山壘二山川林澤俱蜃尊二邱陵墳衍原隰俱散尊二各於壇上南陛之東北向西上其嶽壇上加山壘一壘置於山尊東北向比戶加設玉篚於尊坵之所設洗於壇南陛東南如常執尊壘篚幕者各位於尊壘篚幕之後郊社令帥齋即以尊坵壘洗篚幕入設於位祭日未明十五刻太官令帥宰人以鸞刀割牲齋即以豆取牲血置於饌所遂烹牲未明二刻太史令郊社令各服其服入設神位各於壇上

北方南向席皆以莞設神位各於座首未明一刻祭官
以下各服其服郊社令良醞令入實尊罍及玉山罍實以醞
齊罍尊實以
沈齊敬尊及山罍皆實以清酒齊加明水酒
加元酒各實于上尊祭神之玉以兩珪有郅太祝以幣置於筐太官令
帥進饌者實諸籩豆簠簋等奉禮帥贊者先入就位贊
引引御史太祝與執尊罍篚幕者入自東門當壇南重
行北向西上立定奉禮曰再拜贊者承傳御史以下皆
再拜訖執尊罍篚幕者各就位贊引引御史詣壇東陛
升行埽除於上令史祝史行埽除於下訖引就位贊明
謁者引獻官贊引引執事者俱就東門外位太樂令帥
工人次入就位謁者贊引各引獻官以下入就位立定
奉禮曰再拜在位者皆再拜謁者進獻官之左白有司
謹具請行事退復位協律郎跪俛伏興舉麾鼓祝奏順
和之樂以蕤賓之均自後壇下之
樂皆奏姑洗樂三成偃麾戛故樂止奉

禮曰再拜獻官以下皆再拜太祝取玉於篚立於尊所
謁者引獻官詣嶽壇升自南陛北向太祝以玉幣東向
授獻官受登歌作肅和之樂以函鍾之均謁者引獻官
進北面跪奠於嶽神之座俛伏興謁者引退北面再拜
訖登歌止謁者引獻官降自南陛還本位初獻官升奠
玉幣太官令帥進饌者奉饌陳於東門外登歌止太官
令引饌入俎初入門雍和之樂作饌至陛樂止饌升南
陛太祝迎引於壇上設於嶽神座前邊豆蓋
徹之如式設訖太官
令以下降自東陛以出太祝還尊所其鎮海以下之饌
皆祝史迎於壇上設於神座前相次而畢訖謁者引獻
官詣罍洗盥手洗爵訖謁者引升自南陛詣酒尊所執
尊者舉罍獻官酌醴齊訖樂作謁者引詣嶽神座北向
跪奠爵興謁者引獻官少退北向立樂止初獻官進奠

爵祝史各以爵酌奠鎮海以下還尊所太祝持版於神
座之右東面跪讀祝文祝文臨時撰訖興獻官再拜初讀祝文
訖樂作太祝進奠版於神座還尊所獻官拜訖樂止太
祝酌鬯福酒進獻官之右西向立獻官再拜受爵跪祭
酒啐酒奠爵興太祝帥齋郎進俎太祝滅神前二牲胙
肉皆取前脚第一骨加於俎西向授獻官受以授齋郎獻官跪取
爵遂飲卒爵太祝受爵復於坵獻官興再拜謁者引獻
官降復位諸祝各徹豆如常訖還尊所奉禮曰賜胙贊
者唱再拜在位者皆再拜獻官不拜順和之樂作奉禮又曰再
拜獻官以下皆再拜樂一成止謁者進獻官之左白請
就望瘞位西向立於眾官將拜諸太祝各執篚進神座
前跪取玉幣齋郎以俎載毛血等各由其陞降壇詣瘞
坵以物置於坵訖奉禮曰可瘞坵東西各四人寘土半

坵謁者進獻官之左白禮畢遂引出贊引引執事者以
次出又贊引引御史太祝以下俱復執事位奉禮曰再
拜御史以下皆再拜訖出贊引引工人以次出其祝版
燔於齋所

肆觀東后

望秩之明日肆觀東后於告至之前刺史縣令皆先奉
見如常將作先於行宮之南為宮壇方三百步面一門
為壇於壇內三分壇二在南壇方九丈六尺高四尺四
出陛南面兩陛餘三面各一陛前二日太樂令設宮懸之樂於壇南如殿
庭之儀前一日尚舍鋪御座於壇上近北南向又設解
劍席於南陛之西南守宮於門外量設百官次文東武
西以北為上東方刺史縣令次於文官之南蕃客次於
武官之南所司陳輦輅於壇南如常典儀設羣官版位

文官一品以下九品以上位於壇東南每等異位重行
西面以北爲上武官一品以下九品以上位於壇西南
當文官每等異位重行東面以北爲上東方刺史縣令
於壇南三分庭一在南每等異位重行北面以西爲上
若有蕃客則位於刺史之西每國異位重行北面以東
爲上設典儀位於南陛之東贊者二人在南差退俱西
向北上奉禮設門外位文官一品以下九品以上位於
門東每等異位重行西面武官一品以下九品以上位
於門西每等異位重行東面俱以北爲上設東方刺史
縣令位於文官之南每等異位重行西面以北爲上蕃
客位於武官之南每國異位重行東面以北爲上其日
未明三刻諸衛各以其方器服量設牙旗於壇外四面
未明一刻諸衛各勒所部列黃麾大仗屯門及鉞戟陳

於壇內如殿庭之儀羣官及刺史以下各集就次服其
朝服蕃客集次各服其服侍中版奏請中嚴近仗陳於
行宮門外諸侍衛之官各服其器服符寶郎奉寶俱詣
行宮門外奉迎典儀帥贊者先入就位吏部兵部主客
戶部贊羣官客使俱出次通事舍人各引就門外位刺
史縣令俱執贄通事舍人引就門外位贊各以其土所有錦綺
縵布葛越之屬俱五兩
爲一束而執之
仍飾以黃氍其餘當土常貢之物並盛以篚其屬執之列
於縣令位後通事舍人引文武官一品以下九品以上
先入就位侍中版奏外辦皇帝將出仗動太樂令令撞
黃鍾之鐘右五鐘皆應協律郎舉麾工鼓祝奏太和之
樂皇帝服袞冕乘輿以出曲直華蓋警蹕侍衛如常儀
皇帝入自北壇門由北陛升壇卽御座樂止腰輿退其
羽儀華蓋仍侍於御側通事舍人引東方刺史以下入

就位鴻臚引蕃客次入就位初刺史入境門懸下舉麾
舒和之樂作至位立定樂止典儀曰再拜贊者承傳執
贊者俱跪奠贊興在位者皆再拜訖跪取贊興凡拜奠贊皆如之
侍中前承制降詣刺史東北西面立稱有制蕃客則舍人承旨宣敕刺
史以下皆再拜宣制訖又再拜戶部引諸州貢物兩行
各入於刺史位前東西陳之龜為前列金次之丹漆絲
纊四海九州美物重行量陳於後訖執物者各退立於
東西廂文武前側立通事舍人引刺史為首者一人執
贊詣解劔席跪解劔脫舄執贊興舍人接引升壇詣御
座前北面跪奏稱具官臣姓名等敢獻壤奠遂奠贊俛
伏興又舍人跪舉以東授所司舍人引刺史降詣解劔
席跪佩劔納舄興通事舍人引復北面位初為首者奠
贊通事舍人引在庭者以次奠贊於位前訖各俛伏興

引退復位訖刺史以下俱再拜戶部尚書進詣階間北
面跪奏稱戶部尚書臣某言諸州貢物請付所司俛伏
興侍中前承詔退稱制曰可尚書退復位所司受贊其
執貢物各進執物所司引退俱出東門初刺史將朝中
書侍郎以諸州鎮表文別為一案俟於西門外給事中
以祥瑞案俟於東門外俱令史絳公服對舉案侍郎給
事中俱就侍臣班初刺史將入門中書侍郎降引表案
入詣西階下東面立給事中降引祥瑞案詣東階下西
面立刺史將升奠中書令黃門侍郎俱降立於階下刺
史執贊升階中書令黃門侍郎各執所奏之文以次升
初戶部尚書奏退復位訖中書令前跪奏諸方表訖黃
門侍郎又進跪奏祥瑞各還侍位侍郎與給事中引案
退司儀曰再拜贊者承傳文武羣官刺史以下及諸國

蕃客俱再拜訖通事舍人以次引北面位者出就門外
位侍中前奏稱侍中臣某言禮畢俛伏興還侍位皇帝
興太樂令令撞蕤賓之鐘左五鐘皆應太和之樂作皇
帝乘輿降自北陛警蹕侍衛如來儀入行宮樂止通事
舍人引東西面位者以次出設會如正會之儀

考制度

朝覲之明日左右丞相以考制度事奏聞命太常卿採
詩陳之以觀百姓之風俗命市納賈以觀百姓之所好
惡命典禮者考時月定日同律觀禮樂制度衣服正之
山川神祇有不舉者為不敬宗廟有不順者為不孝不
孝不敬者則長官黜以爵革制度衣服者為叛叛者長
官有討有功德于百姓者加爵賞五月南巡狩至于南
嶽如東巡狩之禮八月西巡狩至于西嶽如南巡狩之

禮十有一月北巡狩至于北嶽如西巡狩之禮歸格于
宗禰用特如別禮若告封禪如別儀

蕙田案開元禮諸儀皆仿虞書舜典禮記王
制最為雅正

唐書元宗本紀開元二十年十月壬午如潞州丙戌中
書門下盧巡幸所過囚辛卯赦潞州給復三年賜高年
粟帛十一月辛丑如北都癸丑赦北都給復三年庚申
如汾陰大赦免供頓州今歲稅賜文武官階勳爵諸州
侍老帛武德以來功臣後及唐隆功臣三品以上一子
官民醮三日十二月辛未至自汾陰

冊府元龜開元二十四年正月敕以前議西幸屬歲不
登闕輔之閒且欲無擾今稼漸熟漕運復多而陵寢又
違蒸嘗永感農隙順動得非其時前取今年十月幸西

五禮通考卷第一百八十一
京者以其月三日發東都取南路應緣頓所務要崇節
減所司明為條例勿有煩勞十月戊申發東都幸京師
甲子至陝州丁亥至京師

右唐

五禮通考卷第一百七十九

五禮通考卷第一百八十

內廷供奉禮部右侍郎金匱秦熹編輯

翰林院編修嘉定王鳴盛

李天保總纂禮部觀承同訂

直隸按察司副使元和宋宗元 參校

嘉禮五十三

巡狩

宋史禮志巡幸之制唐開元禮有告至肆觀考制度之
儀開寶通禮因之太祖幸西京所過賜夏秋田租之半
真宗朝諸陵乃舉大禮途中皆服折上巾窄袍出京過
京城服韠袍具轡駕羣臣公服繫鞵供奉班及內朝官
前導凡從官並日赴行宮合班起居晚朝視事羣臣不
赴中頓侍食百官就宿頓迎駕訖先發或道途隘遠則
免迎駕將進發近臣諸軍賜裝錢出京留司馬步諸軍
夾道左至新城門外奉辭留守辭于門內百官父老辭

于苑前召留守等賜飲苑中州縣長吏留司官待于境
所過賜巡警兵守津梁行郵治道卒時服錢履父老綾
袍茶帛途中賜衛士緡錢所幸寺觀賜道釋茶帛或加
紫衣師號吏民有以饗餼酒果方物獻者計值答之命
官籍所過繫囚逋負者日引對多原釋仍採訪民間疾
苦賑恤鰥寡孤獨車服度量權衡有不如法則舉儀制
禁之有奇材異德及政事尤異者孝子順孫義夫節婦
爲鄉里所稱者其不守廉隅昧于正理者竝條析以聞
官吏知民間疾苦者亦許錄奏所過州府結綵爲樓陳
音樂百戲道釋以威儀奉迎者悉有賜東京留守遣官
表請還京優詔答之駕還京大陳兵衛以入凡行幸太
祖太宗不常其數自咸平中車駕每出金吾將軍率士
二百人執搗周繞謂之禁圍春夏緋衣秋冬紫衣郊祀

省方竝增二百服錦襖出京師則加執劍親王中書樞
密宣徽行園內餘官園外大禮備儀衛則有司先布土
爲黃道白宮至祀所左右設香臺畫瓮青繩闌干巡省
在途則不設凡巡省翰林進號傳詩付樞密院每夕摘
字令衛士相應爲識東京舊城城門西京皇城司並契
勘內外城宮廟門竝勘箭出入皆然入藩鎮外城子城
門亦勘箭朝陵定扈從官人數入柏城者僕射以上三
人丞郎以上六人餘各一人東封定仗內導駕官從人
數親王中書樞密宣徽三司使四人學士尙書丞郎節
度使三人大兩省大卿監三司副使樞密承旨客省閤
門使副金吾大將軍押仗鳴珂內殿崇班以上二人餘
各一人命諸司巡察之自後舉大禮皆循此制
太祖本紀建隆元年夏六月上如潞辛卯大赦減死罪

免附潞三十里今年租錄陣歿將校子孫丁夫給復三年

開寶九年春三月丙子幸西京已卯次鞏縣庚辰賜河南府民今年田租之半辛巳至洛陽辛卯幸廣化寺開

無畏三藏塔夏四月丙午駕還辛亥上至自洛文獻通考太宗太平興國二年平太原五年次大名皆如太祖勞軍之制

真宗咸平二年幸大名景德元年駐澶淵勞軍之禮如祖宗四年正月幸西京朝諸侯命知雜御史王濟等籍所過父老及繫囚逋負官物人仍察民間疾苦每日引逋欠人及禁囚等對於行在多蠲免原釋父老賜茶帛綾袍其貢香藥名馬者召對撫慰賜之金帛

大中祥符元年三月詔許羣臣請封禪令泰山路茸行

宮不得侵民戶田苗及人馬損踐苗稼有司言準禮巡狩有燔柴告至皇帝親行事卽不載有司攝事之文車駕至泰山合行告至望令大尉以酒脯幣帛於泰山下壇告至奏可又詔給事中張秉等管句所經州縣父老詣行在者送門引對賜以酒食州縣見禁囚具所犯以聞又詔以御史中丞王嗣宗攝御史大夫爲考制度使左正言制誥周起攝中丞爲副使所經州縣採訪民間不便事併市物之價車服權衡度量不如法則者舉儀制禁之有奇才異行隱淪不仕者與所屬長史詢求論薦鰥寡惻獨不能自存者重加賑恤官吏政迹尤異民受其惠及不守廉隅昧於政理者孝子順孫義夫節婦爲鄉里所稱者並條析以聞官吏知民間利病者亦爲錄奏有司言澶州城門卑下不容大輦請徹門而出上

慮煩勞不許詔由城外而過他所皆然又詔扈從人病頓所無得壞民舍什物樹木違者重寘其罪為朝覲壇於奉高宮之南方九丈六尺高九尺四出陛其南兩陛設衛仗宮懸於壇中書門下文武百官皇親諸軍將校四方朝貢使舉人蕃客父老僧道皆在列設龔文宣公位於文官三品之下隣州長史悉集上服袞御壽昌幄殿受朝賀大赦天下遂幸兗州賜從官待制以上宗室將軍辟寒九紫花茸綿細窄袍三畢祀汾陰悉如東封之制八月有司言祠宇之旁難行覲禮望俟至河中府朝覲經度制置使陳堯叟等言寶鼎行宮之前可以設壇詔如堯叟等語

宋史真宗本紀大中祥符四年春正月丁酉發京師甲辰至慈澗頓賜道傍耕民茶菴二月戊申賜扈駕諸軍

緡錢壬子出潼關渡渭河癸丑次河中府丁巳次寶鼎縣辛酉幸開元寺作大甯宮大赦天下文武官並進秩四品以上迨事太祖太宗潛藩或當更邊任家無食祿者錄其子孫建寶鼎縣為慶成軍給西京分司官實奉三分之一令法官慎刑名有情法重者以聞賜天下醮三日大宴羣臣於穆清殿賜父老酒衣幣乙丑觀醮乙巳次華州幸雲臺觀庚午宴宜澤亭召見隱士鄭隱李甯賜茶果束帛辛未次閿鄉縣召見道士柴又元問以無為之要壬申宴號州父老於湖城行宮三月甲戌次陝州召草澤魏野辭疾不至乙亥賜運船卒時服已卯次西京庚辰罷河北緣邊工役壬午幸上清宮甲申幸崇法院丁亥詔葺所經歷帝王祠廟己丑御五鳳樓觀醮壬辰詔朝陵自西京至鞏縣不舉樂癸巳禁扈從

人踐田稼甲午發西京夏四月甲辰朔上至自汾陰
高宗本紀建炎元年秋七月乙巳手詔京師未可往當
巡幸東南丙午詔定議巡幸南陽九月壬辰以金人犯
河陽汜水軍詔擇日巡幸淮甸丁酉詔荆襄關陝江淮
皆備巡幸冬十月丁巳朔帝登舟幸淮甸庚午次泗州
幸普照寺己卯次楚州寶應縣三年春正月庚辰朔
帝在揚州二月壬子內侍鄺詢報金兵至帝被甲馳幸
鎮江府是日金兵過揚子橋癸丑游騎至瓜州王淵請
幸杭州是夕發鎮江次呂城鎮甲寅次常州丙辰次平
江府己未次秀州壬戌駐蹕杭州夏四月丁卯帝發杭
州五月戊寅朔帝次常州辛巳次鎮江府乙酉至江甯
府駐蹕神霄宮改府名建康六月甲戌移御行宮閏八
月壬寅帝發建康復還浙西張俊辛巳宗以其軍從甲

辰次鎮江府賜陳東家金冬十月癸未帝至杭州復如
浙東庚寅渡浙江壬辰帝至越州十一月丁卯下詔回
浙西己巳帝發越州癸酉帝如明州十二月己丑帝乘
樓船次定海縣給行在諸軍雪寒錢癸巳帝次昌國縣
庚子移幸溫州

老學庵筆記建炎初大駕駐蹕南京揚州而東京置
留守司則百司庶府爲二其一曰在京某司其一曰
行在某司其後大駕幸建康會稽而六宮往江西則
亦分爲二曰行在某司行宮某司已而大駕幸建康
六宮留臨安則建康爲行在臨安爲行宮今東京阻
隔而臨安官司猶曰行在某司示不忘恢復也建
炎三年春車駕倉卒南渡駐蹕於杭有侍臣召對者
既對所陳劄子首曰恭維陛下歲二月東巡狩至於

錢塘呂相頤浩見之笑曰秀才家識甚好惡

文獻通考紹興元年十一月詔以紹興駐蹕日久漕運艱梗兵軍薪水不便可移蹕臨安府二年正月車駕至臨安府駐蹕 七年二月車駕自平江進發次鎮江三月至建康府駐蹕 八年二月車駕自建康府進發至臨安府還宮 三十一年車駕自臨安府進發視師次臨平江鎮 三十二年正月車駕次建康府二月車駕自建康府回臨安

蕙田案宋自南渡以後播遷海滙但可謂之臨幸不得謂之巡狩但以一代典禮攸關姑采附焉亦春秋天王下狩河陽之意爾

右宋

遼史營衛志遼國盡有大漠浸包長城之境因宜為治

秋冬違寒春夏避暑隨水草就畋漁歲以為常四時各有行在之所謂之捺鉢春捺鉢曰鴨子河灤皇帝正月上旬起牙帳約六十日方至天鵝未至卓帳冰上鑿冰取魚冰泮乃縱鷹鷂捕鵝雁晨出暮歸從事弋獵鴨子河灤東西二十里南北三十里在長春州東北三十五里四面皆沙塢多榆柳杏林皇帝每至侍御皆服墨綠色衣各備連錐一柄鷹食一器刺鵝錐一枚於灤周圍相去各五七步排立皇帝冠巾衣時服繫玉束帶於上風望之有鵝之處舉旗探騎馳報遠泊鳴鼓鵝驚騰起左右圍騎皆舉幟麾之五坊擎進海東青鵝拜授皇帝放之鵝擒鵝墜勢力不加排立近者舉錐刺鵝取腦以飼鵝救鵝人例賞銀絹皇帝得頭鵝薦廟羣臣各獻酒果舉樂更相酬酢致賀語皆插鵝毛於首以為樂賜從

人酒遍散其毛弋獵結網釣春盡乃還夏捺鉢無常所
多在吐兒山道宗每歲先幸黑山拜聖宗興宗陵賞金
蓮乃幸子河避暑吐兒山在黑山東北三百里近饅頭
山黑山在慶州北十三里上有池池中有金蓮子河在
吐兒山東北三百里懷州西山有清涼殿亦爲行幸避
暑之所四月中旬起牙帳卜吉地爲納涼所五月末旬
六月上旬至居五旬與北南臣僚議國事暇日遊獵七
月中旬乃去秋捺鉢曰伏虎林七月中旬自納涼處起
牙帳入山射鹿及虎林在永州西北五十里嘗有虎據
林傷害居民畜牧景宗領數騎獵焉虎伏草際戰慄不
敢仰視上舍之因號伏虎林每歲車駕至皇族而下分
布灑水側伺夜將半鹿飲鹽水令獵人吹角效鹿鳴旣
集而射之謂之舐齶鹿又名呼鹿冬捺鉢曰廣平淀在

永州東南三十里本名白馬淀東西二十餘里南北十
餘里地甚坦夷四望皆沙磧木多榆柳其地饒沙冬月
稍暖牙帳多於此坐冬與北南大臣會議國事時出校
獵講武兼受南宋及諸國禮貢皇帝牙帳以槍爲硬寨
用毛繩連繫每槍下黑氊傘一以芘衛士風雪槍外小
氊帳一層每帳五人各執兵仗爲禁圍南有省方殿殿
北約二里曰壽甯殿皆木柱竹椽以氊爲葢彩繪韜柱
錦爲壁衣加緋繡額又以黃布繡龍爲地障牕榻皆以
氊爲之傅以黃油絹基高尺餘兩廂廊廡亦以氊葢無
門戶省方殿北有鹿皮帳帳次北有八方公用殿壽甯
殿北有長春帳衛以梗寨宮用契丹兵四千人每日輪
番千人祇直禁圍外卓槍爲寨夜則拔槍移卓御寢帳
周圍拒馬外設鋪傳鈴宿衛每歲四時周而復始

文昌雜錄北國謂住坐處曰捺鉢四時皆然如春捺鉢之類是也不曉其義近者彼國中書舍人王師儒來修祭奠余充接伴使因以問師儒答云是契丹家語猶言行在也

太祖本紀太祖三年春正月幸遼東

太宗本紀天顯三年夏四月戊寅東巡 四年夏六月

己酉西巡己未選輕騎數千獵近山癸亥駐蹕涼陁秋

七月庚辰觀市曲赦繫囚甲午祠太祖而東八月辛丑

至自涼陁九月庚午如南京戊寅祠木葉山癸巳至南

京冬十二月戊午至自南京 七年冬十二月丁巳西

狩駐蹕平地松林

會同元年春二月戊戌幸遼河東三月壬戌將東幸三
剋言農務方興請減輜重促還期從之 三年春三月

己巳如南京壬申次石嶺庚寅詔扈從擾民者從軍律

甲午幸薊州乙未晉及南唐各遣使來覲夏四月庚子

至燕備法駕入自拱辰門御元和殿行入閣禮六月壬

寅駕發燕京癸丑次奉聖州

聖宗本紀統和元年秋八月戊子上西巡癸巳遂幸懷

州九月辛酉幸祖州壬戌還上京 三年秋七月甲寅

東幸丙寅駐蹕土河以暴漲命造船橋明日乘步輦出

聽政八月丁丑次藁城庚辰至顯州辛巳幸乾州觀新

宮辛丑西幸閏九月丙子行次海上戊戌駐蹕東古山

四年冬十月乙卯幸南京戊午以南院大王留甯言

復南院部民今年租賦 十三年春正月壬子幸延芳

淀庚申詔諸道觀農 十五年夏四月己酉幸南京己

未如炭山清暑秋九月庚午幸饒州冬十一月丙戌幸

顯州十二月己酉駐蹕駝山

開泰四年十二月南巡海徼還幸顯州

太平五年秋九月駐蹕南京是歲燕民以年穀豐熟車駕臨幸爭以土物來獻上禮高年惠鰥寡賜酺飲至夕六街燈火如晝士庶嬉遊上亦微行觀之

右遼

金史太宗本紀天會八年七月丁卯上如東京十月乙亥上至自東京 十年十月上如興中府十二月上至自興中府

熙宗本紀天眷元年二月壬戌上如爻刺春水乙丑幸

天開殿六月戊午至自天開殿 三年四月丁卯上如

燕京九月戊申上至燕京己酉親享太祖廟

皇統二年二月丁卯上如天開殿三月辛丑還自天開

殿 四年二月癸未上如東京丙申次百泊河春水五

月辛亥朔次薰風殿九月乙酉上如東京壬子畋於沙

河射虎獲之十月辛酉詔薰風殿二十里內及巡幸所

過五里內竝復一歲十二月甲午至東京 五年二月

乙未次濟州春水三月戊辰次天開殿八月戊戌發天

開殿九月庚申至自東京

程案傳案熙宗時歷翰林待制兼右諫議大夫上疏其略曰古者天子皆有巡狩無非事者或省察風俗或審理冤獄或問民疾苦布宣德澤皆巡狩之名也國家肇興誠恐郡國新民棄本逐末習舊染之污奢侈詐偽或有不明之獄僭濫之刑或力役無時四民失業今鑿輅省方將憲古行事臣願天心洞照委之長貳釐正風俗或置匭匣以申冤枉或遣使郡國問

民無告皆古巡狩之事昔漢昭帝問疾苦光武求民
瘼如此則和氣通天下不平可坐而待也疏奏上嘉
納之

八年二月乙卯上如天開殿四月庚戌至自天開殿

海陵本紀天德四年四月壬辰上自泰州如涼陞五月

乙卯次臨潢府六月甲子朔駐綿山八月丙子次於鐸

瓦九月甲午次中京

貞元元年二月庚申上自中京如燕京三月辛亥上至

燕京初備法駕二年三月丙戌幸大興府

正隆六年二月癸亥發中都丙寅次安肅州三月癸巳

次河南府因出獵幸汝州温湯視行宮地自中都至河

南所過麥皆爲空復禁扈從母輒離次及遊賞飲酒犯

者罪皆死而莫有從者四月丁卯次温湯誠扈從母輒

過汝水上

世宗本紀天定元年十一月辛巳以如中都期日詔羣

臣壬午詔中都都轉運使左淵曰凡宮殿張設毋得增

置毋役一夫以擾百姓但謹圍禁嚴出入而已己丑如

中都次小口使中都留守宗憲先往壬辰次梁魚務丙

申次義州十二月乙卯次三河縣丙辰次通州丁巳至

中都壬戌詔軍士自東京扈從至京師者復三年四

年正月丁酉如安州春水壬寅至安州大獵詔扈從人

舍民家者人日支錢一百與其主二月丁巳免安州今

年賦役及保塞縣御城邊吳二村凡扈從人嘗止其家

者亦復一年辛酉獵於高陽之北庚午還都六年三

月甲寅上如西京庚申次歸化州西京留守唐括德温

上謁戊辰至西京五月戊申幸華嚴寺觀故遼諸帝銅

三才集卷一百一
十
像詔主僧謹視之壬子詔雲中大同縣及警巡院給復
一年壬戌詔將幸銀山諸扈從軍士賜錢五萬貫有敢
損苗稼者竝償之六月丙戌發自西京庚子獵於銀山
七月辛酉次三义口八月辛未朔次涼陁庚辰獵於望
雲之南山九月辛丑朔至自西京 七年九月庚寅次
保州詔修起居注王天祺察訪所經過州縣官十月乙
未朔上謂侍臣曰近聞朕所幸郡邑曾宴寢堂宇後皆
避之此甚無謂可宣諭仍令舊居止戊申還都 八年
五月乙丑上如涼陁七月己卯次三义口上諭點檢司
曰沿路禾稼甚佳其扈從人少有蹂踐則當汝罪八月
乙卯至自涼陁 十二年五月癸酉上如百花川甲戌
命賑山東東路胡刺温猛安民饑丁丑次阻居久旱而
雨戊寅觀稼禁扈從蹂踐民田禁百官及承應人不得

服純黃油衣癸未諭宰臣曰朕每次舍凡秣馬之具皆
假于民間多亡失不還其主此彈壓官不職可擇人代
之所過卽令詢問亡失民間什物竝償其直乙酉詔給
西北路人戶牛六月甲寅如金蓮川九月丙子至自金
蓮川 十四年五月甲午如金蓮川八月丁巳次紉里
舌日中白龍見御帳東小港中須臾乘雲雷而去九月
丁亥還都 十八年正月壬戌如春水二月丙寅朔次
管壯丙子次華港己丑還宮四月己巳上謂宰臣曰朕
巡幸所至必令體訪官吏臧否向玉田知主簿石抹沓
乃能吏也可授本縣令五月丙午上如金蓮川八月乙
巳至自金蓮川 二十年正月己巳如春水丙子幸石
城縣行宮丁丑以玉田縣行宮之地偏林爲御林大淀
樂爲長春淀二月丁未還都 二十二年三月甲申諭

戶部今歲行幸山後所須竝不得取之民間雖所用人夫竝以官錢和雇違者杖八十罷職四月甲子上如金蓮川九月戊寅至自金蓮川二十三年正月壬午如春水詔夾道三十里內被役之民與免今年租稅仍給傭直二月乙巳還都二十四年三月壬寅如上京四月庚申次廣甯府丙寅次東京丁卯給復東京百里內夏秋稅租一年在城隨關年七十者補一官曲赦百里內犯徒二年以下罪乙酉觀漁于混同江五月己丑至上京居于光興宮戊戌宴于皇武殿上謂宗戚曰朕思故鄉積有日矣今既至此可極歡飲君臣同之賜諸王妃主宰執百官命婦各有差宗戚皆霑醉起舞竟日乃罷六月辛酉幸按出虎水臨漪亭壬戌閱馬于綠野淀七月己未上謂宰臣曰天子巡狩當舉善罰惡凡士民

之孝弟嫻睦者舉而用之其不顧廉恥無行之人則教戒之不悛者則加懲罰丙午獵于勃野淀八月乙亥詔免上京今年市稅

續文獻通考時世宗將幸上京大理司直路伯達上書諫曰人君以四海為家豈獨舊邦是思空京師而事遠遊非慎重之道也書奏不報後薛王府掾梁襄上疏極諫曰金蓮川在重山之北地積陰冷五穀不殖郡縣難建蓋自古極邊荒棄之壤也氣殊候異中夏降霜一日之閒寒暑交至特與上京中都不同尤非聖躬將攝之所凡奉養之具無不遠勞飛輓越山踰險其費數倍至於頓舍之處車騎闐塞主客不分牛馬風逸以難收滅獲逋逃而莫得奪攘蹂躪未易禁止公卿百官衛士富者車帳僅容貧者穴居露處

輿臺阜隸不免困踣饑不得食寒不得衣一夫致疾染及眾人天傷無辜何異刃殺此特細故耳有大于此者臣聞高城浚池深居邃禁帝王之藩籬也壯士健馬堅甲利兵帝王之爪牙也今行宮之所無有高殿廣宇城池之固是廢其藩籬也掛甲常坐之馬日暴雨蝕臣知其必羸瘠矣禦侮待用之軍穴居野處冷啖寒眠臣知其必疲瘵矣衛官周廬纔容數人一旦霖潦積旬衣甲弓刀霑溼柔脆豈堪爲用是失其爪牙也神龍不可以失所人主不可以輕行雖陛下悅以使人勞而不怨豈若不勞爲愈人君者不可恃人無異謀要在處已無憂患之地耳燕都地處雄要北倚山險南壓區夏若坐堂皇俯視庭宇本地所生人馬勇勁方遼雖小止以得燕故能控制南北坐致

宋幣燕蓋京都之選首也況今又有宮闕井邑之繁麗倉廩府庫之充實百官僚屬皆處其內非曩日之陪京也居庸古北松亭榆林等關東西千里山峻相連近在都畿易於據守陛下舍此而他往倘有內隙乘之臣甚懼焉議者謂往年遼國之君春水秋山冬夏捺鉢舊人喜談之以爲真得快樂之趣陛下效之耳臣謂三代之政今有不可行者況遼之過舉哉且遼之基業根本在山北之臨潢其所遊不過臨潢之旁儀物殊簡輜重不多隔三五歲方一行非歲歲如此也本朝皇業根本在山南之燕豈可舍燕而之山北乎上京之人棟宇是居不便遷徙方今幅員萬里惟奉一君承平日久制度殊異文物增廣輜重浩穰隨駕生聚殆逾百萬如何歲歲而行以一身之樂歲

使百萬之人困于役傷于財陛下其忍之歟世宗納之爲罷行

章宗本紀明昌五年四月乙卯幸景明宮五月庚午次烏十撒八六月壬辰如冰井己亥出獵登胡土白山酌酒再拜曹王永升以下進酒丙午曲赦西北路己未如杏沙秋山七月戊辰獵于豁赤火一發貫雙鹿是日獲鹿二百二十二賜扈從官有差辛巳次魯溫合失不是日上親射獲黃羊四百七十一乙酉次冰井丙戌以天壽節宴樞光殿凡從官及承應人遇覃恩遷秩者並受宣勅于殿前八月辛亥至自景明宮六年正月壬辰如春水二月庚午至自春水九月辛卯如秋山十月丙辰至自秋山丁巳以歲幸春水秋山五日一進起居表自今可十日一進

承安五年正月丙申如春水辛丑諭點檢司車駕所至仍令百姓市易二月辛未至自春水

泰和二年五月壬戌諭有司曰金井捺鉢不過二三日留朕之所止一涼厦足矣若加修治徒費人力其藩籬不急之處用圍幕可也已已勅御史臺京師拜廟及巡幸所過州縣止令灑掃不許以黃土覆道違者糾之五年正月丁卯如光春宮春水乙亥詔有司自泰和三年郡縣三經行幸民嘗供億者賜今年租稅之半丁丑次霸州二月己亥如建春宮三月庚申還宮宣宗本紀貞祐二年四月乙卯尚書省奏巡幸南京詔從之壬午車駕發中都丙戌次定興禁有司扈從蹂踐民田丁亥次安肅州癸巳次中山府勅扈從軍所踐禾稼計直酬之六月癸丑次內邱縣戊午次彰德府曲赦

境內庚申次鉅橋鎮壬戌次宜村秋七月車駕至南京

右金

元史世祖本紀中統元年冬十月戊午車駕駐昔光之地命給官錢雇在京橐駝運米萬石輸行在所十二月乙巳帝至自和林駐驛燕京近郊二年春二月丙午車駕幸開平詔減免民間差發罷守隘諸軍秦蜀行省借民錢給軍以今年稅賦償之免平陽太原軍站戶重科租稅四年春二月甲子車駕幸開平秋八月壬申車駕至自上都至元元年春二月癸酉車駕幸上都詔諸路總管史權等二十三人赴上都大朝會弛邊城軍器之禁九月辛巳車駕至自上都四年春二月帝幸上都秋九月車駕至自上都

續文獻通考至元三十一年九月聖誕節帝駐蹕三部落受百官朝賀時監察御史崔敬疏言太祖以上都為清暑之地車駕行幸歲以為常閣有大安殿有鴻禧睿思所以保養聖躬適起居之宜存畏敬之心也今失刺幹耳朶思乃先皇所以備宴遊非常時臨御之所陛下方以孝治天下屢降德音祇行宗廟親祀之禮雖動植無知罔不歡悅而國家多故天道變更臣備員風紀以言為職願大駕還大內居深宮嚴宿衛與宰臣謀治道萬幾之暇則命經筵進講究古今盛衰之由緝熙聖學乃宗廟之福也

元史成宗本紀元貞元年春二月丁酉車駕幸上都秋九月甲戌帝至自上都大德三年春二月癸丑朔車駕幸柳林庚辰幸上都秋

九月癸未聖誕節駐蹕古柵受諸王百官賀乙亥車駕還大都

續文獻通考成宗時每歲或二月三月車駕幸上都至九月或十月還大都

武宗本紀至大元年春三月戊寅車駕幸上都秋九月乙亥車駕至上都

仁宗本紀至大四年閏七月甲辰車駕將還大都太后以秋稼方盛勿令鷹坊馳人衛士先往庶免害稼擾民勅禁止之

英宗本紀至治元年春三月辛巳車駕幸上都秋八月車駕駐蹕興和左右以寒甚請還京師帝曰兵以牛馬為重民以稼穡為本朕遲留益欲馬得芻牧民得刈穫一舉兩得何計乎寒九月丙子駐蹕昂兀嶺丁酉車駕

還大都 二年春三月丁酉幸柳林夏四月戊戌朔車駕幸上都五月甲申車駕幸五臺山六月丁卯朔車駕至五臺山禁扈從宿衛毋踐民禾秋七月車駕次應州三年春三月壬辰朔車駕幸上都秋八月癸亥車駕南還駐蹕南坡

續文獻通考至治時每歲幸上都如仁宗

泰定帝本紀泰定元年夏四月甲子車駕幸上都秋八月車駕至大都 三年春二月甲辰車駕幸上都秋七月甲辰車駕發上都禁車騎踐民禾九月庚申車駕至大都 四年春二月壬午狩于瀋州三月壬戌車駕幸上都秋閏九月車駕至大都

續文獻通考泰定時每歲幸上都如英宗

文宗本紀至順元年夏五月戊辰車駕發大都次大口

已巳次龍虎臺六月丙戌大駕至上都秋閏七月大駕將還勅上都兵馬司官二員率兵士由偏嶺至明安巡邏以防盜賊丁酉大駕發上都八月己未大駕至京師續文獻通考至順元年樞密院臣言每歲大駕幸上都發各衛軍士千五百人扈從又發諸衛護軍萬五千人以駐山後蒙古軍三千人駐官山以守關梁乞如舊數調遣以俟來年從之 三年五月大駕發大都時巡于上都

元史順帝本紀元統二年夏四月車駕時巡上都秋九月辛卯車駕還自上都

至元元年夏五月戊子車駕時巡上都遣使者謁曲阜孔子廟致祭秋九月庚辰朔車駕駐扼胡嶺 二年夏四月戊戌車駕時巡上都秋九月戊辰車駕還自上都

三年夏四月己卯車駕時巡上都秋七月丙午車駕幸失刺幹耳朶丁未車駕幸龍岡灑馬乳以祭八月車駕至自上都

至正元年夏四月車駕時巡上都秋八月車駕至自上都

右元

明會典永樂六年改定巡狩儀注 一詔諸司及鎮守官知會 一禮部預行各處凡有重事并四夷來朝俱達行在所仍具本啟聞其餘事務奏啟俱達京師啟聞施行事有疑礙者在京合該衙門具奏取自上裁凡進拜表文達行在所箋文達京師 一禮部預行經過所在軍民衙門俟車駕至官吏生員耆老朝見及預行北京畿內文武衙門令掌印官俟車駕至朝見 一祭祀

車駕將發奏告天地社稷太廟孝陵祭大江旗纛等神
輒祭於承天門其經過處所滁州遣官祭滁陽王泗州
遣官祭祖陵鳳陽祭皇陵祭淮關里遣官祭先師孔子
望祭泰山沿途古先聖賢忠臣烈士祠墳禮部預期奏
聞遣官致祭將至北京境上設壇祭北京山川等神車
駕至北京奏告天地祭告境內山川等神一扈從在
京馬步軍五萬人內馬軍一萬步軍四萬馬軍五千步
軍五千充駕前軍餘馬軍五千步軍三萬五千分五軍
率領每軍馬軍一千步軍七千以都指揮指揮千百戶
管領錦衣衛仍選將軍五百人校尉二千五百人力士
二千人一侍從五府都督各一員首領官一員吏六
人吏部堂上官一員文選等四司官五員辦事官二十
員歷事監生四十八人人才五十人吏十人戶部堂上官

一員北京等十二司官十三員辦事官十員吏二十四
人禮部堂上官二員儀制等四司官七員辦事官十員
吏十二人鑄印局官一員吏一人匠六人兵部堂上官
一員武選等四司官七員辦事官五員吏十五人刑部
堂上官一員浙江等十二司官十二員辦事官五員吏
十三人工部堂上官二員營繕等四司官十員辦事官
二十員吏十五人都察院堂上官一員浙江等十二道
監察御史二十四員辦事官五員吏二十四人通政司
堂上官二員首領官一員吏六人大理寺堂上官一員
左右寺官六員吏十人太常寺堂上官二員首領官一
員吏二人贊禮郎四員協律郎一員司樂一員樂舞生
二十人厨子五十人光祿寺堂上官三員首領官一員
署官十七員辦事官六員吏三人厨子一千人鴻臚寺

堂上官四員首領官一員序班四十員鳴贊四員及通曉夷語者斟酌帶去翰林院內閣官三員侍講修撰典籍等官六員書制勅秀才八人及譯寫四夷文字監生十三人尙寶司官二員吏科給事中三員戶科給事中三員禮科給事中三員兵科給事中三員刑科給事中三員工科給事中三員中書舍人四員寫誥秀才五人行人司行人十員太醫院堂上官二員御醫二員生藥庫官一員醫士摘選三分之一二吏三人欽天監官三員天文生十五人教坊司奉鑾部舞司樂各一員併長色長樂工斟酌用之 一扈從文武官軍人等陸路文武官員人等寫制誥秀才譯字監生緊用供應醫士天文生及各厨役人等俱給馬騾驢匹官給外腳力驢給鈔六十錠自備辦事官監生人才吏典及醫士厨役等非

緊用者人給腳力鈔二十錠隨伍官員將軍校尉力士旗軍每二人給驢一匹如不敷亦給鈔六十錠自備水路俱應付船隻遇陸路應付車輛 一緣途各站每站增馬二十四匹令附近衛所馬軍內差撥仍令附近有司備車一百輛無車之處起夫五百人聽候 一經過處所支給糧草扈從官員人等日給行糧二升馬日給料四升草一束驢料一升草一束 一車駕將發宴在京文武羣臣賜扈從文武官員軍校人等鈔五十錠侯四十錠伯三十錠一品二品二十錠三品四品十五錠五品十二錠六品七品十錠八品九品八錠未入流及辦事官將軍總小旗人鈔七錠將軍及各衛總小旗人鈔六錠監生秀才吏典人材醫士樂舞生軍校力士厨子工匠人鈔五錠軍伴皂隸樂工人等人鈔四錠在外

衛所扈從及各處駐劄官軍依京衛官軍例給賞一
車駕至北京宴文武羣臣耆老賜官員人等及命婦鈔
其嘗守城命婦論次行賞一遇萬壽聖節公侯駙馬
伯文武官四品以上近侍官及監察御史預宴五品以
下并辦事官監生秀才吏典軍民工匠人等依例賜鈔
一錠一五府六部都察院大理寺錦衣衛各鑄印信
通政司鴻臚寺鑄關防一扈從官員有牙牌者隨身
懸帶以憑關防出入一經過郡縣分遣廷臣考覈守
令賢否即加黜陟分令給事中監察御史存問高年賜
幣帛酒肉一經過鳳陽陵戶及親戚人賜鈔六錠耆
老迎見者人鈔三錠泗州陵戶親戚耆老迎見者賞如
之

續文獻通考永樂六年八月丙戌詔明年二月巡北京

七年正月命學士胡廣諭德楊榮金幼孜修撰王英
等扈從二月上啟行命皇太子監國三月車駕至北京
御奉天殿受朝賀八年十月丁酉車駕發北京十一
月癸亥朔冬至車駕還京十一年二月上巡幸北京
皇太孫從十五年三月壬子上巡北京皇太子監國
命胡廣楊榮金幼孜扈從
宣德五年九月車駕巡近郊冬十月丙子車駕發京師
駐蹕玉河諭成國公等曰今農收雖畢而禾稼在場民
閒公私之費皆出于此扈從官軍不許入民家有所求
索違者處以重刑其申令各營悉知之壬午駐蹕雷家
站召學士楊士奇楊榮金幼孜楊溥問曰唐太宗過此
非征遼時乎眾對曰然上曰太宗恃其英武而勤遠略
此行所喪不少帝王之鑒戒也又問此山崩于順帝時

人率謂元亡之徵卿等以為如何眾對曰順帝自是亡國之主雖山不崩國亦亡上曰此言正合朕意昔聖帝明王之世未嘗無災異大抵國之存亡係其君德之仁與不仁而已戊子回鑾駐泥河壬辰車駕至京師九年九月上將率師巡邊命蹇義楊士奇楊榮胡濙楊溥吳中等扈從癸未車駕發京師丁酉駐蹕洗馬嶺庚子迴鑾

正德十二年八月上出居庸關至懷來宣府等處游獵邊將江彬輩導之也先是彬與邊將許泰劉暉等皆有寵于上賜姓朱氏號曰外四家上在豹房同卧起狎近而彬寵尤盛屢導上出宮游戲近郊至居庸關巡關御史張欽閉關上疏不聽遂遠出關外楊廷和等累疏請回鑾九月上幸大同獵陽和

明史世宗本紀嘉靖十八年二月乙卯幸承天辛酉次真定望于北嶽丁卯次衛輝三月己巳渡河祭大河之神辛未次鈞州望于中嶽庚辰至承天戊子御龍飛殿受賀詔赦天下給復承天三年免湖廣明年田賦五之二畿內河南三之一夏四月壬子至白承天甲子幸大峪山丙寅還宮

明會典嘉靖十八年南巡儀注 一先期上親奏告皇天于元極寶殿同日告聞皇祖太廟皇考睿宗廟遣官分告北郊成祖列聖羣廟太社稷帝社稷朝日夕月天神地祇用祭服太常寺備脯醢酒果翰林院撰告文一轍祭於承天門遣官祭旗纛之神用牲醴制帛三獻如常儀 一駕發出正陽中門后妃輦轎後隨錦衣衛設欽製武陳駕備輦輿儀仗等項扈行本衛選精壯旗

校八千人內以六千人專管擡奉上座輿輦二千人專管擺執駕儀及一應正直巡綽傳宣等用選委千百戶一百二十員分投管理各分撥班接替行太僕寺調取寄養馬三千匹兌給各旗校更迭騎坐以錦衣衛指揮充前驅使領千百戶等官先往肅清道路簡命武職重臣二員留守京城兵部尚書一員參贊機務各請勅行事以文職大臣一員總督整飭宣大等處軍務一員提督薊州山海關等處地方邊備文職重臣一員充行邊使往遼東薊宣大雁門固原等九邊閱視邊備戶部齎銀隨去勞賞官軍各請勅行事兵部奏請皇城四門京城九門大明門外兩邊守門文武大臣各一員坐邊官侯伯二員增設守門官軍用科道官點閱京城內外巡捕官軍行團營再選有馬官軍三千員名分爲兩班酌

派五城地方與同舊有官軍巡邏仍選委坐營官及各提督把總等官晝夜巡捕安定德勝門各土城門外及鄭村壩大黃莊居庸關白羊口六處地方該營揀選有馬官軍每處一千員名分爲兩班輪流下營防守安定德勝門土城各用東西官廳聽征總兵官一員其餘各用參將一員統領下營紫荆倒馬二關保定撫鎮官揀選精銳有馬官軍每關一千員名分爲兩班每月輪流下營守把各委坐營官一員統領一兵部於團營東西官廳御馬監勇士內揀扈駕官軍六千員名給兌馬匹內執武陳駕儀一千人總兵官一員領之駕前後各二千人參將二員領之駕左右各五百人翼駕行左右副參將領之及行文沿途撫鎮等官調撥兵馬屯駐扈駕先期戶部請勅命侍郎一員率屬官六員帶領太倉

銀三十餘萬兩前去沿途整理官軍糧料工部請勅差
郎中一員同內官監督理沿途橋道及行宮席殿禮部
行南北直隸浙江等十三布政司凡有要緊重事俱達
行在所奏聞其餘事務俱達在京通政使司照常封進
各該衙門啟請皇太子令旨行其事有疑礙者各差人
赴行在所奏取旨各處拜進表箋除歲例等項赴在京
禮部照常類收啟請司禮監官捧進其特賀大禮不係
常典者原差人恭詣行在投進 一扈從官五府堂上
官各一員首領官各一員吏各一人吏部堂上官一員
文選等四司官各一員辦事官六員吏六人戶部堂上
官二員浙江等十三司官各一員辦事官二員吏十三
人禮部堂上官二員儀制等四司官共六員鑄印局官
一員辦事官六員儒士三人吏十二人鑄印匠四人兵

部堂上官一員武選等四司官共六員辦事官一員吏
六人刑部堂上官一員浙江等十三司官各一員辦事
官一員吏十三人工部堂上官二員營繕等四司官共
十員辦事官二員吏十人都察院堂上官二員浙江等
十三道監察御史各二員辦事官四員吏十三人通政
司堂上官二員首領官一員辦事官二員吏二人大理
寺堂上官一員左右寺官二員辦事官二員吏二人太
常寺堂上官六員首領官二員屬官十員吏二人執事
人役四十人廚役三十人光祿寺堂上官二員四署官
四員吏四人廚役二百人太僕寺堂上官一員首領官
一員吏一人鴻臚寺堂上官俱從司儀司賓各一員鳴
贊四員序班十六員通事四員翰林院堂上并講讀等
官四員制勅誥勅二房官共二十員譯字官生四人吏

十人尙寶司官四員吏一人六科給事十二員吏六人中書舍人一員吏一人行人司行人十員吏三人太醫院堂上官五員御醫吏目八員聖濟殿醫士選帶三分之一吏二人欽天監堂上官一員博士等官八員天文生陰陽人共十人吏一人教坊司奉鑾韶舞司樂八員俳色長樂工二百人扈從文武內外官及各項人役合用夫馬驢羸車輛廩給口糧各項應付事宜兵部定擬奏請轉行在外有司一體應付內府印綬監收貯先年行在衙門印信關防禮部領出給付各扈從官使用尙寶司給領文武字樣牙牌一駕發留守大臣率在京文武衙門官員各俱吉服先期赴宣武門外彰義關候送駕過退扈從官分程先發在途俱免朝參候駕惟禮兵二部鴻臚寺太常寺科道糾儀官從行光祿寺隨路

預辦御膳酒飯供具凡遇行宮進膳處所各該撫按守巡兵備等官選委精壯官軍披帶盔甲器械拱衛乘輿不許誼譁錯亂違者聽錦衣衛即時具奏拏問其扈駕官軍戶部給散行糧工部辦鍋竈不許分外索害有司及入民舍混擾違者許被害之人赴撫按衙門告治仍行隨駕緝事官校訪拏重治各該軍衛有司不許分外科斂違者聽撫按官體訪指實參究重治各衙門跟隨吏書人等各照兵部原行關文於軍衛有司驛遞衙門應付不許分外多索其應付衙門亦要即時應付毋得遲誤違者俱赴所在官司告治經過駐劄地方原有商賈店鋪開賣飯食等物照常市貿不許躲避亦不許從駕人員用強輕價勒買違者許被害之人即時告治兵部咨行各該巡撫官預先出給榜文曉諭一經過處

所真定望祭北嶽恒山之神用牛犢羊豕上具常服行禮如常儀五府九卿巡撫大臣吉服陪拜衛輝遣官祭濟瀆之神用太牢鈞州望祭中嶽嵩山之神滎澤祭河神俱用太牢行禮如北嶽南陽遣官祭武當山之神用牲犢沿途古帝王聖賢忠臣烈士祠墓禮部查訪預期奏聞遣官致祭帝王用太牢次用少牢又次脯醢酒果凡祭翰林院撰祭文 一各處撫按并三司官俱於所屬境上候駕先赴行在鴻臚報名駕至行宮各具吉服朝見所過府衛州縣官吏生員耆老人等俱於三十里外候迎道旁跪叩頭駕過退駕至行宮鴻臚寺引見俱行五拜三叩頭禮 一各處近路王府許親王具常服預先出城候駕其餘宗室俱不許擅離府出迎 一諸王迎接先期命文武大臣侍於途王於道傍拱立文武

大臣下馬侍上左右禮部尚書跪奏某王某恭迎聖駕見內侍官引王至駕前跪行叩頭禮禮部尚書進立於上前候旨承旨訖起立傳旨示王隨至行宮上入少憩王具冕服欽定文武大臣於殿內左右侍從官於丹墀東西侍班候上陞座鴻臚寺官引王由殿左門入至拜位贊行五拜三叩頭禮畢上命賜宴內侍官引王於別次少候從官叩頭如常儀王宴畢遣大臣伴送回府駕還先以書止諸王勿煩出送 一上臨舊邸恭詣皇考睿宗獻皇帝謁告_{儀具祠}越四日行祭告皇天禮於龍飛殿丹陛奉皇考睿宗獻皇帝配是日上更皮弁服詣國社壇及山川壇行告祭禮次日恭謁顯陵_{儀具祠}次日從駕官上表賀遂頒詔前期一日鴻臚寺陳設表案詔案於龍飛殿中錦衣衛設隨駕朝儀及迎詔綵輿香亭於

丹墀教坊司設中和韶樂百官各具朝服地方官吏師
生耆老人等俱隨班行禮是日早鳴鐘鼓上具冕服御
後殿執事官行禮畢上陞殿鳴鞭欽天監官唱時鴻臚
寺贊入班贊四拜興平身唱宣表目宣表目官宣訖唱
宣表宣表官宣訖贊俯伏興四拜興贊頒詔翰林院官
捧詔授禮部尚書捧詔置雲盤內叩頭興由殿中門出
置綵輿內錦衣衛官校舉輿教坊鼓樂前導百官趨出
候於龍飛門外鴻臚寺贊入班行四拜禮贊跪宣詔畢
贊俯伏興搢笏贊舞蹈山呼出笏贊四拜興平身禮畢
禮部尚書捧詔出膳黃奏差行人等官頒行天下一
聖駕回京上親奏謝皇天上帝於元極寶殿同日告謝
皇祖太廟皇考睿宗廟如常儀文武官例該陪祀者俱
具祭服陪拜遣官分告北郊成祖列聖羣廟太社稷帝

社稷朝日月天神地祇太歲旗纛都城隍等神承天
門之神俱行禮如初 一百官上表稱賀如常儀

右明

五禮通考卷第一百八十

五禮通考卷第一百八十

